

# NSENTEDI, UDI WAMBA

## BISHI BWÀ BUFUKU?



[Badi babala Mifundu ya Mwaneetu William Branham mu Yeshaayi 21.1-12 kudi Mwaneetu Gene Goad—Muf.]

*Dîyi dya bujitu pa bidi bitangila cipeela cya ku luseke lwa mbû. Padi mvunda ya ku sud ipicilamu; nanku udi ufumina mu cipeela, ku buloba budi bukwacisha bwôwà.*

*Mbangambile cikeena-kumona cya cyenza bibi ku mwoyi; ngèndààmùshìngà mwena mashimi udi wenda mushinga ne mashimi, ne mupawudi yêyè udi upawula. Bândaaku, Wêwè Elâmà: cincimika, Wêwè Meedàâyà; dipùmuna dyònsò dya kwôkò aku mêmè ngaamanyi kudipuwisha.*

*Ki bwa cinyi twonyi twanyi ntûle tente ne dikùyila, bisaamà bya cimpicimpi mbinkwate, byenze bu bisaamà bya pa kulela bya mukaji: ngâkashâala mukobame ku dyumvwa dya bwalu abu; ngâkakèma ne dyanyina ku dicimona.*

*Mwoyi wanyi wakatuuta lukasalukasa, bwôwà kunkwata: yêyè washintululu bufuku bwa disanka dyanyi bushaale bwôwà kûndi.*

*Longololaayi meesa, tangilaayi pa cibumba cya nsentedi, dyayi, nwayi: juukaayi panshi, nwènù bânà baa mfumu, ne laabaayi maanyi ku ngabu.*

*Bwalu emu mmudi Mukalenge mungambile: Nda, uteeke nsentedi, àmbè cidiye umona aci.*

*Nenku yêyè kumona dikalu dya mvita ne babàndi baa pa tubalu babidi, dikalu dya mvita dya mpunda, ne dikalu dya mvita dya tuumeelu; ki yêyè kuteeleja ne ntema yònsò ne mubawule maci:*

*Nenku yêyè wakeela lubila ne: Ntambwe: Mukalenge wanyi, ndi anu kacya ngîmana pa cibumba cya nsentedi mundaamuunya, ne ndi muteekiibwe mu mwaba wanyi wa mudimu bufuku ne bufuku bwònsò.*

*Nenku, monaayi, ki dikalu dya mvita dya bantu balume dilwalwà edi, diikale ne babàndi baa pa tubalu babidi. Ki yêyè kwandamuna e kwamba ne: Baabulona ùpukù, ùpukù; ne bimfwanyi bisonga bya tunzambi twende byònsò mmubicibwile panshi.*

*Éyi wêwè wanyi udibo bashiipule, ne blé wa mu cishiipwilu cyanyi: cîndi mêmè muumvwe kudi*

*MUKALENGE wa bilwilu, Nzambi wa Izaleela, ki cyôci cingânwâmbidi aci.*

*Diyi dya bujitu pa bidi bitangila Dumà. Yèyè udi umbüikidila mu Seir ne: Nsentedi, udi wamba bishi bwa bufuku? Nsentedi, udi wamba bishi bwa bufuku?*

*Nsentedi kwambaye ne: Dinda dilwalwa, ne bufuku kabidi: nwênù baswe kukonka, konkaayi: Alukilaayi, lwâyi.*

[Katupa kaa mukaba wa mêyi munda mutupu—Muf.]

<sup>2</sup> Twasakidila, Mwaneetu Neville. Mbîmpè bwa dikumona cyakabidi.

<sup>3</sup> Mwoyi wenu awu mu dinda emu, nwênù kalaasa keetu kaa Bible, bu mutütù banange kunwela myoyi mu Dîna dya Mukalenge Yesu. Nenku pâmvwâ ngendesha mashinyi ngenda mpweka ne njila anu katanci kakese aka, ne famiye wanyi, mvwa ngenda ngeela meeji ku bantu batu bapatuka balwa mu ekeleeziya mu matuku a busenu mushindu ewu, padi nêjè mwikale mu ditunga dijima, bya njiwu be mu njila. Kabeena balwa anu bwa kubamonabo to. Badi ne kiipacila kampanda mu dilwa dyabo. Ne mêmè ndi ne disanka dyâbüngi pa kumona kasumbu kadi mwaba ewu aka mu dinda emu, mu mushindu wa ne, too ne mpindyewu, “Diitabuuja dya baataatù beetu, dicikàle ne mwoyi adi,” didi anu dilakuka kapyà mu myoyi ya balume ne bakaji myaba yônsò.

<sup>4</sup> Bâfumu ku dibala Dîyi kudi Mwaneetu Gene Goad, dya mu nshapita wa 21 wa Mukanda wa Yeshaayi, mutwikala mwa kulongela, bwa katanci kaa dîbà, ne pashiishe kwenza disambidila dya babeedi. Nenku mpindyewu bwa cyena-bwalu, mu dinda emu, ndi muswe kwangatamu, kubangila ku mvensa wa 11 too ne ku wa 12 aku ne: *Nsentedi, Udi Wamba Bishi Bwà Bufuku?*

<sup>5</sup> Nenku kumpala kwa twêtù kubanga dyakula, twinyikaayi mitu yetu katanci kakese cyanaana bwa disambila.

<sup>6</sup> Mukalenge Nzambi, Wèwè udi Nzambi wa baataatù beetu. Wèwè udi Nzambi Wâkapwidija mupuuya wa mwoyi wa nzânzânâ ûkaadiku mulwe pa buloba, ne utu mwangate bukontononyi pa mwoyi ne mwoyi wônsò too ne mu cikondo cya mpindyewu eci, ne newikale ne bukontononyi kashidi ne kashidi. Bwalu Wèwè ki Mufuki wa bukwabantu bwônsò, ne wa bintu byônsò bidi bipuuyakana. Wèwè ki Mufuki.

<sup>7</sup> Ne tudi ne disanka, mu dinda emu, dya kwitabuuja munda mwa myoyi yetu ne milayi Yebe mmilelela, wônsò wa ku yôyi. Ne mu milayi miine eyi, Wèwè udi mwambe ne mwaba wônsò udi babidi anyi basatu basangile mu Dîna Dyebe, Wèwè newikale munkaci mwa bantu Beebe, ne neWandamune ku dibiikila dyabo.

8 Nenku nyewu kudi myoyi mineeme bujitu leelu ewu. Kacya anu ku dibwela dya mu ekeleeziya, ndi mmona badi mu tulaalu twa dyambwila babeedi anyi badi mu tulaalu twa dibunya. Ne bamwe biikale ne maboko a miteelu mabunya, bwa mäsamà a twìshi—mäsamà a twìshi mu maboko abo. Ne bakwabo, mûndi mûmvwe bamba, mbadi bajimije bananga baabo. Nenku, kaa, mbuloba bwa mpekaatu ne bwa lwonji's! Kadi, nansha nanku, bikengela bwa bintu byònsò ebi bikookeshiibwe mu Mukalenge Yesu, Yèyè mwine wàkatwàmbila, ne: “Maalu ònsò adi akwacishangana bwa dyakalenga dya badi banange Nzambi.”

9 Nenku tudi basambiibwe mu dinda emu, pa kwitabuuya ne byàbûngì bya ku biine bintu ebi mbwa kututuma ku binù. Ne tudi banange kwikala kwela meeji ku Mufundu, wa ne: “Aba badi bindila Mukalenge nebavwijulule dikanda dyabo dipyadiya. Nebabande muulu ne mapwapwa bu mukanku. Nebanyeeme lubilu kabayi bacyoka to. Nebëndè lwà makàsà kabayi bapangila to.” Nenku anu mudi mwedi wa kasala mwambe ne: “Ndongeshaanyi, Mukalenge. Ndongeshaanyi, Mukalenge, mwa kwindila.”

10 Twètù, leelu ewu, patudi bindile bwa kuumvwa maalu a ku Butumbi apa, ne a mukana mwa Musungidi wetu, ku Nyuma Mwîmpè, swaku bwa twikale bindile ne lutuulu lwònsò bwa kuumvwa Dîyì Dyende ditwambila bintu bya dinanga, ku Dîyì Dyende, ne ditwambila ditufwila dya luse ku mpekaatu yetu, ne dyondopiibwa ku mäsamà etu.

11 Nenku swaku bwa tuumuke mu tabernacle ewu mu dinda emu, twenda tucyonkomoka, ne twamba mwakambabo kudi bavwa bafumina ku Êmawùsè abu ne: “Myoyi yetu kayivwa yilakuka kapyà munda mwetu pavwaYe wenda uyiikilangana neetu mu njila apu anyi?” Bwalu tudi twitabuuya bulelela ne Yèyè m’Mukalenge mubiike ku lufu, bu mwakaMusanganabo diine dituku adi amu. Ne Yèyè udi munkaci mwa cisamba. Twètù katwakucyokaku to, ne myoyi yetu kayakwimanaku to. Swaku anu bwa twètù kuvwijulula diitabuuya dyetu dipyadiya, ku dibà ne ku dibà, mu Wèwè. Enzaku nanku's, Taatù.

12 Tudi tulomba bwa Wèwè kubenesha Dîyì difunda. Ne bwa kubenesha maci ikala mwa kuumvwa, ne mishiku yikala mwa kwakula; ne dipetelaaku Wèwè mwine Butumbi. Bwalu mu Dînà dya Yesu mmutudi tulomba emu. Amen.

13 Kakwena nansha umwe wa kutudi eku udi mutwibwe cisalù cya kayi mwa kupetaku yèyè ntatu to. Nzambi kàtukù mulaye bwa kutwepula ku mäsamà ònsò to. Kadi baakafunda, ne: “Dikanda Dyende ndikumbane, ne Yèyè kaakutwomekela bujitu bwàbûngì budiYe kayi mwa kutupeela ngàsà bwa kubutwala nansha.” Pa nanku tudi ne disambiibwa adi dya kumanya nanku.

14 Bwa meeji a cyena-bwalu mpindyewu mene, bwa katanci kakese cyanaana, pa cintu kampanda cidi cimweke bu cinteeka pa mwoyi mu ndambu wa mēbà áshààdi aa ne: *Nsentedi, Udi Wamba Bishi Bwà Bufuku?*

15 Civwa pàmwāpa bu, pankaci paa dibwela dya dībà ne diila dya bufuku. Ne civwa cifwanyine kwikala dituku dya dikwàcisha bwōwà mu cimenga, bwalu lubila lwa didimwija luvwa lwediibwe, bwa ne bōbò, nsentedi uvwa pa cibumba awu, uvwa mwandamune dīyì ne ùvwa mumone mu ntanta lupwishi lujuka ku nkata ya makalu a mvita. Ne yēyè uvwa muumvwe mikuma ya bikono bya tubalu, mu ntanta mule.

16 Kadi bu muvwa nsongaakaji yibidi ya bitende mwa kwikala miimane ku ciina cya m̄yì, ne mu cipimu cyabo cya bwānà, cya bunsonga aci, bavwa ne maalu àbūngì a kwelangana meeji, muvwabo badyambidila's, kupita cìvwà dīyì dya nsentedi ewu adi. Pàmwāpa kadivwa ne mushinga wàbūngì kudibo bōbò to, bwalu bacivwa anu mu nsoka ya bunsonga. Pàmwāpa mbwalu kuvwa ne cya kwenzeka fēte diloolo adi, ne nsongaakaji eyi miikale yijinga kuya mu mwine fēte awu. Ne bivwa bimweke anu bu ne didimwija dya nsentedi awu kadivwa difwanyine kwikala ne bwenzaji pa bivwabo bōbò naabi bu bisankasanka bya pa buloba bivwabo badifwanyikijile bwa diloolo adi abi to. Nenku pavwa muyiiki awu mwa kutungunuka, nenku—nenku nsongaakaji umwe uvwa mwa kwambila mukwende ne: “Kì mbibi bya menemene anyi, bwa ne, mu dituku dyetu edi, twikale ne beena tupangìshà baa mushindu awu, muntu pende mufwanyine anu kuteeta ku—kutuumusha ku dyēsè ditudi naadi, ne ku masanka atudiku bafwanyine kwikala naawu?”

17 Ne mēmè ndi ngeela meeji ne aci ncifwanyine anu kwikala cyamba kukumbanangana ne ngumvwijilu wa cyena leelu wa leelu ewu ewu, mudi bantu bateeta kudicinkila ne paudi uteeta kwikala ne dīsù ditonona ne ubadimwija ku njiwu yidi pabwìpì ne kwenzeka, mbimweke bu ne badi beela meeji ne wēwè udi anu muntu kampanda wa meeji a cyena kale, muntu udi uteeta kuumusha disanka dyōnsò dya mu nsòmbelu's.

18 Nenku tudi bafwanyine cyakabidi kwela meeji ku bansongaalume, pavwabo bafumina ku mwaba wa mudimu, ne kwìsù ne manyaanu a ku mudimu uvwabo babape wa dyenza mu diine dituku adi. Ki nsongaalume kampanda mufwanyine kwambila mukwende awu ne: “Netwēnzè anu tujikija kwowa m̄yì ne kulongolola mwedi b̄impè, katanci kakese cyanaana, mona's, netukatwilangane ku cinwinu cya maala aku, bu pa ciibidilu. Bwalu ndi mutwishiibwe ne wēwè ewu, John, kwēnà mutambe kutacishiibwa kudi mukenji utwâtēēleji leelu ewu awu to, wa nsentedi uvwa pa cibumba, uvwa uteeta kuumushangana disanka dyōnsò dya mu nsòmbelu awu, uteeta pende kutwambila ne njiwu yidi pabwìpì. Kadi, udi mumanye's, twētù tudi ne cilwilu cidi citambe bwimpè cidiku. Ne àbūngì a ku masalaayi

etu adi. . . atu asangila bufuku bwônsò pa mwine mwaba ututu tukatuutakeena, ne tusankila bwobumwe kaaba kamwe ewu, bu—bu mudi ndambu wa manayi a twarta twa mfranga a bulunda, ne dinwa dya twala. Nunku mêmè, bwa ku lwanyi luseke,” muvwaye mufwanyine kwamba’s, “ntu anu mbenga kulubakajiibwa mwoyi pa bidi bitangila nî ncinyi nî ncinyi cya ku bintakanyi bidi nsentedi ewu mufwanyine pende kwamba ebi. Bwalu tudi twitabuuja ne bu kwôkò kwikale njiwu ya ne yikaadi pabwîpî, s’ncya bushuwa ne baalaabi beetu mbadi bafwanyine kumanya bwalu ebu, bampaasata beetu, nunku bôbò’s mbadi bafwanyine kwikala kutwambila pa bidi bitangila maalu bu nanku. Ne twêtù katwena anu tucyuka bwa kwikala kuteelejateeleja maalu aa adibo balonda bwa kusuuyangana naawu a bansentedi baa pa cibumba aba nansha.”

<sup>19</sup> Nunku aci cyôcî kaciyi cimfwanyi cya citambe kumanyika cya ditunga dyetu leelu wa Ndaaya ewu, mudi bansonga baa mu dyetu ditunga edi, ne kaciyi anu bansonga nkaayabo to, kadi bantu bakole baa mu ditunga dyetu edi, s’bakaadi bashaale anu bu nyama ya cisuku’s. Nunku biikale babenga kuteeleja madimwija. Ne padi anu nsentedi mulelela kampanda ufila didimwija, udi wangaciibwa anu bu ne udi mwabuludyanganyi, anyi mukoleshi kampanda wa maalu.

<sup>20</sup> Nunku pakaadi difuku dyenda dyandamuka bufuku, pâmwâpa musalaayi wa ku ciibi, utu ulama ku biibi awu, udi ushaala ndambu bu kaciyi ne diikisha to. Nunku wanji uya ku. . . kudi nsentedi udiye mudyangane nende mutumba awu, wamba ne: “Udiku peebe witabuuja ne mbifwanyine kwenzeka ne nsentedi wawa ikale mubinge anyi?”

<sup>21</sup> Nudi bamanye’s, kutu cintu kampanda pa bidi bitangila njiwu, kutu cintu kampanda pa bidi bitangila lufu, cidi cimweka bu ne cidi ne didyanjila-kudimwija dya bwalu abu. Misangu yâbûngî yitu bananga beetu pabwîpî menemene ne kuyabo dyamwamwa, bitu bimweka anu bu ne kudi kubavwila didimwija kampanda.

<sup>22</sup> Ndi mwa kuvuluka taatù wanyi mêmè, kumpala kwa kufwaye. Ûvwa usanganyiibwa pambelu paa Kentucky kukaavwa bidimu byâbûngî. Kadi, dyakamwe, kumwekaku bu ne cintu kampanda cyakabanga kusaka papa, bwa kuyaye ku cisômbedi cyetu cya kale bwa kuyiikilanganaye ne bananga ne balunda bende.

<sup>23</sup> Paanyima paa yêyè mwalukile kumbelu, mwanaabo wa balume, uvwaye kayiku ne mushindu wa kumona to, wakapeta didimwija mu mushindu wa pabwawu bwa kulwaye ku Jeffersonville bwa kumumonaye. Nunku pavwabo basômbe apu, munkaci mwa kuyiikilangana, papa kukusuka e kuya dyamwamwa mu buloba bukwabo.

24 Ndi mvuluka taatù-mwenu. Anu matuku makese cyanaana kumpala kwa kufwaye, kwambaye ne: “Billy, tuye mèmè ne wêwê mu ditwa dya buluwà bwa nshindi, dya lwalwa luseke lwa Utica mwamwa. Ndi muswe anu bwa nkafikeku mu mwaba wetu wa cisombedi wa kale awu.” Mu mushindu kampanda anyi kansanga, bwa mu bulongolodi bwa Nzambi amu, mèmè ncivwa mukumbane kuya nende dituku adi to. Nenku ki kuyaye dituku adi ne kutwaye buluwà, kadi paakaalukilaye mwikale ukaadi usanganyiibwa mu bis, yèyè—yèyè kundondela, wamba ne: “Mvwa nsanganyiibwa musòmbèlè lwà pamutu paa kakuna. Byònsò bikaadi bishintuluke mpindyewu. Kadi lwà kwinshi aku mu ditumba kampanda dya diitu amu, ku Battle Creek, anu lwà kumutu kwetu menemene aku,” yèyè ne, “kwenzabi anu bu ne mvwa mwa kuumvwa maamù wanyi umbiikila ne: ‘Kaa, Frankie!’” Diloolo adi kufilaye bujaadiki, mu mulongo wa bibasa mwibìdi wa mu ekeleeziya ewu, ku dyabakaji dyanyi eku, ujinga masambila a cisamba bwende yèyè. Kadi paanyima paa ndambu wa matuku anyi, twètù kumujiika’s.

25 Mbimweke anu bu ne Nzambi utu misangu yònsò udyanjila kutuma munsanjeela. Cidi mbwimpè Bwende ne ngàsà Wende, bwa kupa badi ne lulamatu mu myoyi didimwija dya bintu bikaadi pabwìpi ne kwenzeka.

26 Nenku mèmè ndi ne disanka dyàbùngì dya ne mu dituku ditudi ne mwoyi mpindyewu edi, ne, padiku mifitu ne mîdimà ku nseke yònsò, kudi kumweka kwikale ditekemena dibeneshiibwe dikwate bikole ku myoyi ya cisamba cya Nzambi, dya ne pa dîbà kampanda dya butumbi Yesu neafike.

27 Kadi mu cikondo cinene cya lutatu eci, mu cimenga eci, ba nsonga bacilengulule, ne bantu bààbùngì bàvwà kabayiku bacyuka civwa nsentedi awu ne cya kwamba. Mu bushuwa bwa bwalu, bavwa basanganyiibwa mu cinwinu cya maala, banwa maala, fête nkacya watungunuka. Ne masalaayi avwa ônsò munkaci mwa kunwa maala. Nenku bavwa mu dicyonkomoka, badyambidila ne bavwa anu mu dikubiibwa dya menemene edi. “Kakuvwa civwa mwa kubenzela bwalu to,” bwalu bavwa anu ne mpala yikenka ne disanka cyanaana, mutudi twètù bafwanyine kucibiikila’s, dya maala a whisky ne maala a masambakaja.

28 Ki dyakamwe, kubwelaku buludi makalu a mvita mu cimenga amu. Ne biibi bya cinwinu cya maala kuupudiibwabi, ne nzubu miine, ne bingoma bya kabutu kubwelabi mu mudimu, anu bwalu bôbò baakabenga kuteeleja didimwija dya nsentedi awu.

29 Ne midimu ya nsentedi, mu Bible wa kale, uvwa mmuntu musobola. Ûvwa ne cya kwikala muntu wa disù ditonona pa bidi bitangila mibidi ya mu dyulu. Ûvwa ne cya kwikala mumanye anu menemene myaba yidi mitooto milembeleele, bwa kwambila bantu dîbà mu dyòdi. Bààbùngì bàkaavwà bacyoke

abu, bavwa bafwanyine kupatuka, pàmwápa, ne bafwanyine kubula ne tulu, kabaciyi dikiisha, ne bafwanyine kwela mbila mikole kuulu kuvwa nsentedi pa cibumba aku, ne bafwanyine kwela mbila mikole mu méyì aa ne: “Nsentedi, udi wamba bishi bwa bufuku?”

<sup>30</sup> Nenukù yêyè uvwa mwa kutangila mitooto, ne pashiishe uvwa mwa kwamba ne: “Tudi dîbà *kampanda*.”

<sup>31</sup> Pa dîbà adi bavwa mwa kwalukila kuya kalaala, anyi nî mpenyi pònsò pavwabo mwa kusungula bwa kwikala basòmbèle apu, bindile bwa kwisù kutookaku, pàvwà bufuku bwa bucyokeshangana, bwa buzengejangana, bwa kabuyi bupeeshangana diikisha abu mwa kujika.

<sup>32</sup> Nzambi ikaleku ne luse’s we! Ndi ndikonka dîbà ní kí ndyanji kwakana, leelu ewu, dya twètù kwela wetu Nsentedi munene awu lubila ne: “Udi wamba bishi bwa bufuku?” Kudi njiwu miseemene pabwîpì yenda yilwa, ne buloba bujima mbyenze anu bu ne budi bunyukuka ku bwenzeji bwayi.

<sup>33</sup> Bivwa kabidi bikengela bwa nsentedi kwikalaye pa kaaba kende kaa mudimu, dîbà dyònsò. Ne bivwa bikengela bwa yêyè kudimwija bantu ku njiwu yivwa yenda yiseemena. Ki mudimu wende uvwa ngwòwò awu, wa kutentekela njiwu yivwa yenda yiseemena. Nenukù yêyè uvwa usanganyiibwa kuulu pa cibumba civwabo biibake cileepa menemene kupita bimanu. Ne cibumba ciine eci, yêyè uvwa usanganyiibwa kuulu aku, munda mwaci amu, ne mikanda ya dilonga dya mabulunga a muulu, ne bikwabo, bwa kumonaye mwa kwikala kutangila mitooto ne kwamba dîbà. Cintu kana cyònsò civwà ciseemenà aci, pa dîbà kana dyònsò dya dituku, yêyè uvwa mwa kucyamba.

<sup>34</sup> Dîbà adi, yêyè uvwa mwa kumona kule menemene kutamba nî nganyi nî nganyi yònsò uvwa panshi apu. Yêyè uvwa mwa kumona kule kutamba nî nganyi nî nganyi yònsò uvwa pa cimano apu, bwalu yêyè uvwa usanganyiibwa kuulu kutambe. Ne paudi utamba kwenda kubànda muulu, ki paudi mwa kutamba kumona kule menemene. Nenukù udi mwa kwamba njiwu yidi yiseemena, kule menemene kutamba aba badi bàsangaanyiibwà pa buloba.

<sup>35</sup> Nenukù bu muvwa Yeshaayi, mu dituku dyende, wamba ne Nzambi uvwa mumwenze nsentedi. Nzambi uvwa ufwanyikija baprofeta Bende ne mikanku.

<sup>36</sup> Nenukù anu múnkaadi muyiisheiyishe pa cyena bwalu cya mikanku, mukanku nnyuunyi udi mwa kubànda kuya muulu mule menemene kutamba nnyuunyi mukwabo kana yònsò ewu. Ne yêyè udi ne cya kwikala mwibakiibwe mu mushindu wa pabwawu bwa butumbuke budiye ukabwela abu. Mpindyewu, kabemba kí nkafwanyineku kumulonda nansha. Nyuunyi mukwabo nansha umwe kí mmufwanyine kumulonda to. Yêyè nnyuunyi udi Nzambi mwibake, ne

mushindu awu ki utuye mwenjiibwe. Nyuunyi mukwabo kana yônsò ewu yêyè mudidinge anu kuteeta kwangata kaaba kende, mmufwanyine kubutuka. Bikengela ikale ne masala makole, mapwapwa makole. Nenku bidi ne dikwacisha kaayi bwa kuyaye muuulu piikalaye kayi mufwanyine kumona, kwikala ne mèsù mîmpè bwa kumonaye? Kabemba nkafwanyine kufofoma muulu mwamwa; kakayiku kafwanyine kumona to. Kadi padi mukanku utamba kubànda muulu, ki padiwu mwa kutamba kumona kule menemene.

<sup>37</sup> Ne Nzambi utu mufwanyikije baprofeta Bende ne mikanku. Bôbò nnsentedi yidi yibànda muulu menemene, mu mushindu wa ne badi mwa kumona kule menemene. Ne abo mèsù bôbò atu menjiibwe a nyuma mu mushindu wa ne adi mwa kumona njiwu yidi yiseemena.

<sup>38</sup> Nenku Nzambi wakateeka Yeshaayi kuulu bwa kwikalaye udimwija cisamba bwa ne kuvwa njiwu yivwa yiseemena, kadi bôbò kabavwa baswe kumuteeleja nansha.

<sup>39</sup> Nenku, leelu ewu, Nzambi ucitu anu ne mikanku, anyi baamisanjeela, anyi bantu pa cibumba, bàdì bàbànda muulu mu Nyuma, kule kutamba bintu bikwatakaja byônsò, ne bombes yônsò ya mushinda, ne makebulula ônsò a maalu a mamanya. Ûdi ne bantu badi biibaka mu mushindu wa pabwawu bwa kiipacila aku, bàdì bàbànda pa bimanu byalabale bya dyendelapu bya Kalvariyo, mu Dîná dya Mukalenge Yesu, ne kwimana ku lusongo lwa nkuruse, ne biikale ne mushindu wa kwaluja Mukenji ne: “EMU MMUDI MUKALENGE WAMBA.” Lwabo lumònò lwa nyuma ndunene lutambe lwa baakwidi baa mu ntempelo; lutambe kule ne kule lwa muntu wa patupu wa cipidi cyônsò cya nsômbelu ewu; bwalu mbiibakiibwe mu mushindu wa pabwawu bwa midimu yidi Nzambi mubabiikidile. Ki bwa cinyi, bidi bya mushinga kutudi bwa twètù kubawula maci patudi tuteeleja bwa kuumvwa bintu bidi munkaci mwa kuseemena.

<sup>40</sup> Pa dîbà adi ndi muswe kushintulula mpindyewu bwa katanci kakese cyanaana. Nenku ndi muswe kucingulula ntema yenu kuyituma kudi Mfumu wa miine mikanku eyi, anyi baprofeta aba, anyi bansentedi baa pa cibumba aba. Yêyè awu ki Mukalenge Yesu, Yêyè mwine. Ne dituku ditudi twètù ne mwoyi edi divwa dinene kutamba dituku divwaYe panwapa adi kule ne kule, mu mushindu wa ne, pakaavwaYe anu menemene pabwîpî menemene ne kuya ku nkuruse, Yêyè wakaakula bikole bwa Dilwa Dyende diibîdî kutamba mwakaakulaYe bwa diya Dyende. Bu nwênù mwa kukenketa ne ntema yônsò mu Mifundu, nenusangane ne anu pabwîpî menemene ne diya Dyende ne, Yêyè wakamba biprofeta bya maalu avwa ne cya kwenzeka mu dituku edi.



<sup>41</sup> Yèyè uvwa mumanye ne Ûvwa ne cya kupoopediibwa pa nkuruse. Yèyè uvwa mumanye ne Ûvwa ne cya kukengela bapiile pende kayi—kayi mwenze bubi to. Yèyè uvwa mumanye ne Neajuuke cyakabidi mu lukita, mu dituku diisâtù. Yèyè uvwa mumanye ne kakuvwaku makole avwa mwa kuMulaminyina mu lukita to, bwalu Dîyi dya Nzambi dikaavwa dyambe ne: “Ncyakwitabaku bwa Munsantu Wanyi amone dibola to, anyi Ncyakushiyaku musuuka Wende mu iferno to.” Neku kakuvwaku makole avwa mwa kupangisha ciprofeta aci to. Dîyi Dyende nediikale dilelela, ne Ówò neùlè mu mivù yaWu. Neku Yèyè uvwa ne dyyemena ne, civwa Taatù mwambe aci, Taatù uvwa ne bukole bwa kushaala mukwate ku Dîyi Dyende.

<sup>42</sup> Ki bwa cinyi, mwoyi Wende munene ùvwà munda Mwendè awu, ùvwà mwikale Nkwasa wa butumbi wa Nzambi awu, munda mwa mwoyi Wende amu Yèyè uvwa mumanye ne bikondo binene bya diteeciibwa ebi bivwa ne cya kulwa bwa kuteeta matunga ônsò, ne bwa kuteeta bisamba byônsò. Pa nanku, ki bwa cinyi, Yèyè uvwa mumanye ne lukonko lunene lùvwàku, kaluvwa lwa kumanya ne Yèyè neabiike cyakabidi, anyi ne Neapoopediibwe pa nkuruse bilondeshile Mifundu, anyi kaluvwa lwa ne Yèyè neabande mu Dyulu, ne Nyuma Mwîmpè nealwe to. Kadi lukonko luvwa lwa ne: “Kuvwaku mwa kushaala diitabuuja pa buloba ku Dilwa Dyende anyi?” Ne diitabuuja diine didi difumina penyi? “Ku dyumvwa dya Dîyi dya Nzambi.” Lukonko Lwende luvwa ndwôlò alu. “Nekwikaleku diitabuuja pa buloba pâNgàâlwa anyi?” Neasangane bantu badi biitabuuja Dîyi Dyende anyi?

<sup>43</sup> Mpindyewu twêtù aba, mu dituku ditudi ne mwoyi edi, patudi mwa kubuulula mabeji a Dîyi Dyende dibeneshiibwe, ne tusangana bintu biine byakambaYe ne nebyenzeke abi, biikale biseemena pabwîpì ne buloba leelu ewu: Bimanyinu ne maalu a kukema’s ki kwenzekabi eku. “Myoyi ya bantu yidi yamba kwimana bwa bwôwà.” Kudi “dipampakana dya bikondo ne dikenga munkaci mwa matunga. Bintu bimweka bya bikwacisha bwôwà mu maulu,” bu mudi tuumâlôngò tudi tubuuka muulu, ne beena mu Pentagone bashaale myoyi yônsò kuulukuulu. “Ne mbù ukungula, ne dizakala dya buloba mu myaba mishiileshiilangane. Myoyi ya bantu yamba kwimana, bwa bwôwà;” bingoma binene bya tupwishipwishi biteya, bindile. Mifitu milembelele pa buloba, yitu baa pa buloba kabayiku banji kudimwena kwônsò eku to.

<sup>44</sup> Lumingu lushaale elu mvwa mupete dyêsè dya kuyiikilangana ne umwe wa ku balunda baanyi ne bânà beetu bananga, Kapiteena Julius Stadskev, utu mufunde mukanda wa ne: *Muprofeta Ûdi Ûkumbula Àfrikè Wa Ku Sud* awu. Neku Mwaneetu Julius awu uvwa usanganyibwa mu Californie, mudiye ulonga mpindyewu kalaasa kende bwa kupeta mpeta ya bu major mu busalaayi. Ki yèyè. . . Bòbò, beena mudimu baa

cilwilu abu, kumwangatabo bwa diteeta dinene. Ki kukenketabo dilondangana dya bankambwa bende too ne mwakalwabo kujaadika ne nansha mene mamwëndè wa kakwëndè mukaji uvwa nganyi, ne maalu abo malonda ne civwabo bôbô abu, kumpala kwa yêyè kusômbayè mu diine disangisha edi.

<sup>45</sup> Nenku pakaavwaye ufumina mu cisangilu, ne pààkabàndàye too ne ku lusongo lwa kakuna kutuvwa twètù basòmbèle ne balunda baanyi bakwabo aku, kutuutakeenaye naanyi kuntwaku mwinshi mwa kaamuci kaa mupenga, ki kwambaye ne: “Mwaneetu Branham, s’nn cintu cya citamba kucyokeshangana cya kacya ùmvwakù peebe.” Yêyè ne: “Ndi mwinshi mwa mucipu mukole mu mushindu wa nciiyiku mwa kwamba to, anyi kulasulaku kaabwalu nansha kamwe bwa kubuusha nyuunyi to,” yêyè ne, “bwalu tudi... Mbatuteeke mwinshi mwa mucipu wa dîsù dikole. Kadi,” yêyè ne, “bwa eci kaayi ndi mwa kwamba. Cilwilu necifwe. Kabaakwikalaku kabidi ne cilwilu nansha cimwe to; anu ndambu wa balami cyanaana mu nyungulukilu amu. Kabaakwikalaku kabidi ne bya ndeke abi to. Kabaakwikalaku mwa—mwa kutamba kufila dîbà dyabo ku dya dya ndeke ya lubilu lutame bukole ne bikwabo abi to, amba anu mu kiipacila kaa bungèndààmùshingà. Badi dyabo dîbà dyonsò bafila meeji abo anu ku mushindu wa kushindikila anu musangu umwepele munu pa ndènde. Nekulwe dibutudiibwa dya mu kaabujima.”

<sup>46</sup> Kwambaye ne: “Mwaneetu Branham, bantu bônsò aba kî mbamanye ne maalu masokome a mu busalaayi adi cinyi to.” Yêyè ne: “Pavwa banene baa basalaayi aba bayiiikila mu cibambalu amu,” yêyè ne, “kulwaku dibungama dyebe dya njajama edi mu cibambalu amu, mu mushindu wa ne umwe wa ku beena maalu a mamanya wabo wa mushinga munene kujuukaye, kwambaye ne: ‘Mvwa mwa kujinga ne ngikalakù mwa kwangata ditempu dya kale ne ngombe, bwa kwenda kudiyendeshà ngenda nyunguluka mikuna, bwa kudiyenzelaku kaabudimi kaa mbokà ne nkunde, bwa kubipwa byònsò mwoyi.’ Kaa,” yêyè ne, “mbifwanyine kwenzeka ne, bu bwalu ebu mwa kupatuka ne kumanyikabu kudi bantu bônsò, bantu baa pa buloba bujima’s mbafwanyine kupapa ne bwôwà. Njiwu yikaadi yenda yisemena’s.”

<sup>47</sup> Kwambaye ne: “Bakaadi bapete... babiikidisha beena mudimu baabo mpindyewu babuumusha mu bisanga. Bakaadi babiikidija basalaayi baabo bwa kuumukabo mu Angleterre. Nenku bakaadi bapete biimâtù binene bisòmbèle kuntwaku, biikale ne bingoma bya mushindu kampanda. Nenku mbindile anu mvunda wa kumpala wa missile kampanda, nenku ditunga ne ditunga dyònsò nedilekelele mfùndàngà musangu anu umweumwe awu.” Yêyè ne: “Kakwakushaalaku mucu ne dyànyì pa buloba apa to, anyi mukuna umwepele wikala kawuyi munyukushiibwe too ne ku ntaku. Ne ciine aci ncifwanyine

kwenzeka dîbà kana dyônsò edi.” Kaa, ndîbà kaayi dya dibungama’s we!

48 Ne bintu byônsò binudi nuumvwa bamba bya tuumâlôngò tudî tubuuka muulu ebi. Nenku nuvwa bumvwe muyiiki wa babidi ne muntu awu awu, ngeela meeji, makeelela awu, ku tudyomba, yêyè uvwa ulaka mukana muvwaye muyiikile ne bantu awu. Kî nne ndi ne dijinga dya kudyombola muntu awu to, kadi ndongamu wende yônsò mu kaabujima udi ubengangana ne Dîyî. Kî mmujaalame nansha. “Nenku pa dibulunga dya Mars, kabeenapu ne lufu to, ne bôbò abu badi balwa panwapa mbwa kutulongesha mudi kubenga kufwa.” Kadi pakaavwabi ne filaaku cijaadiki, yêyè kaciyiku mwa kupeta kaacijaadiki nansha kaa kânà to, kiine kaa kucijaadikaye naaku aku. Anu mmwenenu kampanda mukwatakaja uvwaye mupatule awu. Kadi, ku dyanyi dimona, ncyà mafi, bwalu Bible mmwambe bishiilangane ne bidiye yêyè mwambe abi.

49 Mêmè ndi mufwanyine kwela patooke cîndî ngeela meeji bwa tuumâlôngò tudî tubuuka muulu atu. Ncyêna ngiitabuujja ne twôtò atu mmindidimbi to. Ncyêna ngiitabuujja ne twôtò atu mbintu bikwatakaja to. Ndi ngiitabuujja ne . . . Kadi ciine eci kaciyena cicivwija ne mbulelela to. Cidi anu mmwenenu wanyi paanyi cyanaana. Kî m’Mukalenge udi mungambile ne ki cîdî twôtò atu to. Kadi, mu kutangila kwa mu Mifundu, bwalu Mwômò amu mmutudi tusangana bintu byônsò.

50 Yesu wakamba ne: “Anu mwakadibi mu matuku a Sodoma, ki mwikalabi kabidi ku dilwa dya Mwànà wa muntu.” Nenku kumpala kwa dibutula dya Sodoma, ne kwa kapya kulokaku ne kwoshaka cimenga ne bibandabanda abi, kwakatumiibwa Banjelo bafumine mu Dyulu, bààkatângilâ ne kukenketabo, bwa kujandula ne maalû aa avwa a cya bushuwa anyi kî ngaa cya bushuwa. Nenku kî mbifwanyineku kwikala mu ngiikadilu ya Nzambi bwa kutuma cyakabidi Banjelo Bende bwa kukenketa ne kujandula, kumpala menemene kwa kabutu kaa kanene kulwaku anyi? Kadi nukaavwaku bamone anyi? Kuvwa Mwanjelo umwepele Wâkalwa, Wâkamwenekela muntu mununu kampanda uvwa mwangate dipangadika bwa Nzambi, ne uvwa musômbe, mudyombola kudi baa pa buloba, mu nnta lwâ mundekeelu mwa cipeela mwamwa, bwalu muntu kampanda uvwa yêyè musungule ne mwangate bubanji bwende bwônsò. Kadi yêyè kwamba ne: “Abi bidî anu bîmpè. Mêmè nênshaalè anu mwaba ewu mu diswa dya Nzambi.”

51 Mbipiciibwe ne mwikale mu diswa dya Nzambi pamutu paa kwikala ne mfranga yônsò yidi baa pa buloba bafwanyine kukupeesha ayi.

52 Nenku dipangadika dya ndekeelu adi ndyenze anu dyangaciibwa, pa dîbà adi Mwanjelo wa Mukalenge kulwaye

kudi Abraham e kwambaye ne: “Tangila ku esete, ku wesete, ku nord, ne ku sud. Byònsò abi mbyebe wêwè, Abraham.”

<sup>53</sup> Mifundu yidi yitwambila ne: “Bapole badi ne disanka: bwalu bòbò nebapyane buloba.” Bidi bishintulula cinyi? Bintu byònsò bya pa buloba’s nebibutuke pamwe ne buloba, kadi Nzambi kêna mwa kubutukaku nansha.

<sup>54</sup> Ne mêmè ndi ngiitabuuja mushindu wûndi mulombodiibwe bwa kwitabuuja awu. Mbwena kwamba ne, padi. . . Fòtò wa Mwanjelo wa Mukalenge Utu ulwa kwenza dijingulula awu.

<sup>55</sup> Nukaavwaku bamone Mwanjelo Wâkalwa kudi Abraham awu anyi? Ûvwa mwele nyima ku ntenta, pavwaYe wakula ne Abraham apu, ki kwambaye ne: “Mêmè nênshaalè mukwate ku mulayi Wanyi wûndi mukwenzele awu.”

<sup>56</sup> Kaa, Mukenji kaayi wa Mwanjelo wa Nzambi mu dituku edi’s we, Yêyè wîkala mwa kushaala mukwate ku mulayi Wende awu! Bupidya bwònsò bwa pa buloba abu, beena mpatà, badi bapange mene kwitaba ne Nzambi udiku abu, ne beena dyabulu, ne beena bupidya, kabaakuvwijaku Bukole bwa Nzambi kabuyi ne bwenzeji nansha. Nebyenzeke anu bu ne kakwena bwalu to.

<sup>57</sup> “Nêmvulukè mulayi Wanyi, ne Mêmè nêmvwijè mulayi Wanyi awu mwîmpè.” Ki Sarah kusekaye mu ntenta paanyima Pende apu.

<sup>58</sup> Kadi Yêyè mwikale mwele nyima ku ntenta, kwambaYe ne: “Sarah waseki bwa cinyi?”

<sup>59</sup> Ki Sarah kupatukaye lubilu e kwambaye ne: “Mêmè ncyêna museke bwala,” bwalu uvwa muumvwe bwôwà.

<sup>60</sup> Ûvwa m’Muntu wa mushindu kaayi mwine ewu? Ndi ndikonka ne n’Nsentedi wa mushindu kaayi uvwa pa cibumba mwine musangu awu? “Mmuntu wa mushindu kaayi udi neetu ewu, Yêyè mungeele nyima, kadi cibi umanya ne ndi museke, mu ntenta?” Vulukaayi ne, Yêyè nguvwa Nsentedi.

<sup>61</sup> Ki Yêyè kukudimuka, kwambaYe ne: “Eyowa’s, s’wâsekì cya bushuwa.” Ki kukwacikaye bwôwà.

<sup>62</sup> Mpindyewu, tudi tumona kabidi ne, mu dituku edi anu kumpala menemene kwa Dilwa dya Mukalenge, Bantu bamwebamwe aba badi ne cya kwalukila. Kadi ndi ndikonka ne, patudi tukenzakana tumona ngiikadilu waBo, tutangila cidiBo benza, ne ndi ndikonka ne bintu byàbûngì bìdì bimwènekà bìdì kabiyi byumvwika ebi kî mmenemene byakamba Yesu ne nebyenzeke anyi. “Nekwikale bimanyinu muulu mu maulu. Ne pa buloba nekwikale dikenga munkaci mwa matunga, dipampakana dya cikondo, dizakala dya buloba mu myaba mishiileshiilangane, ne bantu biikale bafwa diimana dya mwoyi.” Kî mbantu bakaji to; bantu balume. Misangu yàbûngì bantu bakaji kabatu batamba kufwa màsaamà a myoyi to.

Mbantu balume abu. Cidi cyuja cyakamba Yesu ne necyenzeke. NcyakambaYe anu menemene ne necyenzeke.

<sup>63</sup> Ne pashiishe bu mutudi bafwanyine kutungunuka, ku dîbà ne ku dîbà, pa bidi bitangila baprofeta bônso, mwakambabo biprofeta bwa dituku edi. Kî ncifwanyineku kwelesha muntu lubila ne: “Nsentedi, udi wamba bishi bwa bufuku” anyi?

<sup>64</sup> Beena mu Pentagone kabeena ne dyandamuna to. États-Unis kêna ne dyandamuna to. Allemagne, Russie, nansha umwe wa kudibo kêna ne dyandamuna to. Maalu a mamanya kaena ne dyandamuna to.

<sup>65</sup> Udi ne dyandamuna nganyi? Nsentedi, udi pa cibumba awu, ngudi ne dyandamuna. “Nsentedi, udi wamba bishi bwa bufuku?” Nenu Nyuma Mwîmpè ki Nsentedi awu udi munkaci mwa kulongolola bantu, ne ufila madimwija a kudi Nzambi. Yèyè ngudi muteekiibwe bu Nsentedi. Tudi tumona babeedi bondopiibwa, mèsù mafofome atabala, maci mapate ajikudiibwa, bikalaba byendela kuulu, balema banyeema mbilu...batupika bu ngulungu. Byôbî abi biikale byuja... Ncinyi aci? N’Dilwa dya Mukalenge, dyenda didisaka.

<sup>66</sup> Nenu bintu byônso ebi, ne madimwija ônsò aa! Kadi bantu mbatungunuke anu ne kwenda kuya ku maafètes abo a dikanwa dya bière awu, benza bu beena mukupa. Ne badi basangala kabayi bacyuka bwalu. “Nenu badi baja maja, ne badya, ne banwa, ne baselangana, ne babaselesha,” anu mwakamba Nzambi ne nebyenzeke. Kamuyiku mushindu wa kubiimanyika nansha.

<sup>67</sup> Pashiishe bu nwênù mwa kumona, mu cikondo cinene cya ekeleeziya eci, bilondeshile Bwakabuulwibwa 3, mu cikondo eci mpindyewu ki muvwa yèyè wâkapèèshabò Mutooto wa mu Dinda awu, anu kumpala menemene kwa Dilwa.

<sup>68</sup> Tangilaayi numone muvwa Yeshaayi mukumbanangane ne Mifundu paakambaye apu ne: “Nsentedi, udi wamba bishi bwa bufuku?” Wakamba ne: “Dinda dilwalwa, ne bufuku kabidi.” Cinyi? Dinda dilwalwa, kadi bufuku butu bulwa kumpala kwa dinda. Civwa ncinyi? Muntu kana yônso ewu utu mumanye ne kumpala menemene kwa bufuku kucyabu, anu pa mêmà menemene a diseemena dya dituku apu, kwîsù kudi kulwa kufiike kutamba muvwaku kwônso aku.

<sup>69</sup> Kaa, balunda baanyi, teejeaati EMU MMUDI MUKALENGE WAMBA. Panwikala nungangata bu musadidi Wende, tukaadi pabwîpi menemene ne bufuku kucyabu. Ki bwa cinyi eyi mifitu ya yikwacisha bwôwà mmibwikile buloba bujima. Mpabwîpi menemene ne Dilwa dya Mukalenge Yesu. Kî nkushaale kabidi ditekemena mu cîngà cintu to anu mu Dilwa Dyende.

<sup>70</sup> Matunga akaadi alwishangana ne matunga. Nenu bakaadi bakanayile mu nzubu wa dimpongù wa Nzambi too ne

mwayibo kapeta bukole bwa kutaayishangana aba ne aba ne kuvwijangana butu bwa mushinda. Nenku bakaadi ne lwonji, ne biikale kabayi banange ntendeleelu to, ne kabayi bamweka beena Kilisto to. Nenku cimwepele cidi cibàsàka, ne kiipacila kadibo naaku, cidi anu kubutula. Ne bóbò biine mbasonsola kudi mwanjelo wa kabutu utu mutumiibwe ufumina mu dyulu bwa kwikala kusonsola bantu aba awu.

<sup>71</sup> Swayiku ngãmbè, mu Dînà dya Mukalenge Yesu ne, Nyuma Mwîmpè ngudi mutumiibwe bu Nsentedi pa cibumba. Nenku padi bantu beela lubila ne: “Udi wamba bishi bwa bufuku?” Nukaadiku bumvwe panwapa panutonde anyi? Nukaadiku bumvwe mpekaatu munutonde anyi? Nukaadiku bumvwe milongo ya kadyamashinda ya bantu baya bambule bitalu, ne mäsàamà, ne dipeetula dya maalu a Nzambi ku nseke ne ku nseke binutonde anyi? Bufuku bukaadi buleepakane ne bwa bucyokeshangana anyi? “Udi wamba bishi bwa bufuku’s, Nsentedi?”

Yèyè ne: “Dinda dilwalwa.” Nwamonu busambi anyi?

<sup>72</sup> “Ne bufuku kabidi bùlwalwa.” Bufuku ncinyi? Tangilaayi numone mudici cinwangana anu menemene ne Mifundu, Yeshaayi awu. Mu dilondangana dya ciibidilu dya—dya bufuki, diseemena dya dîbà nditu misangu yònsò difikisha mîdimà ku dikwatakanangana ne diyivwija mifiike fitutu. Kwîsù kudi kwenza mîdimà kumpala kwa dituku kutamba citupa cikwabo kana cyònsò cya bufuku. Bwa cinyi? Bukênkè bùkaadi buseemena abu mbudi bubuvwija bufiike fitutu.

<sup>73</sup> Nenku ndiseemena dya Mukalenge Yesu mpindyewu didi ditwala mifitu yidi pa buloba eyi. Yèyè kaakambaku ne: “Padi bintu ebi bibanga kwenzeka, nubanduluke, bwalu bupikudi bwenu bukaadi pawîpi” anyi?

<sup>74</sup> Palestine ukaadi ditunga. Beena Yuda bakaadi baalukile bafumine pa buloba bujima, ne bakaadi bateekiibwemu bwa kuMumona ulwa, bu mwakamba Nzambi ne nebamone. “Nuyiilaayi lusumwinu lwa mucu wa mfigi, pakaadiwu wela ntonga.” Yèyè kwamba ne: “Ki mwikalabi kabidi ne lukongo elu kalwakujika, kalwakupita lwònsò, kalwakufikaku ku ndekeelu to, bintu byònsò ebi kabiyi byenzeke.” Ndukongo kaayi alu? Lukongo ludi lumona mucu wa mfigi wela ntonga alu. Izaleela ki utu misangu yònsò anu mucu wa mfigi awu.

<sup>75</sup> “Cyakashiyabo kudi mukumbi wa ngazama, mukumbi wa hazila wakacidya,” mudi Yowela mwambe. “Cyakashiyabo kudi mukumbi wa hazila, mukumbi wa yeledi wakacidya. Ne cyakashiyabo kudi mukumbi wa yeledi, mukumbi wa lokuseta wakacidya.” Nenku bu nwênù mwa kutangila bilenga, cidi anu cyòci cijàngàlâlà cimwecimwe aci. Cyònsò cya ku bîshì bidi bidye mucu awu too ne kwînshi abi, ncîshì anu cimwecimwe aci, kadi ciikale anu mu citupa cishiilangane.

Nenku mpekaatu umwèumwè awu ne bupidya bumwebumwe byàkabangà kukunya beena Yuda bwa kubamana, ne: “Yesu kî nguvwa Kilisto” abi, byakadya mucu too ne ku cikuuku cyûme. Nenku muprofeta wakacimona, ne wakaasa mwadi. Kadi Mukalenge wakamba ne: “Mémè nêngààlujululè,’ mudi Mukalenge wamba, ‘bidimu byònsò byakadyabo kudi mikumbi ya hazila, ne kudi mukumbi wa lokuseta, ne mikumbi ya ngazama abi.’”

<sup>76</sup> Nenku bwa musangu wa kumpala wa kacya kukaadi bidimu binunu bibidi ne nkama yitaanu, beena Yuda bakaadi baalukila mu buloba bwabo. “Lukongo alu kalwakuwijiibwa cyanaana to, kalwakujimina to, bintu byònsò ebi kabiya byûle.” “Pashiishe Mémè nêmpogolole Nyuma Wanyi mu matuku a ndekeelu,’ mudi Nzambi wamba, ‘pambidi paa bânà Baanyi baa balume ne baa bakaji, ne bôbò nebâmbè biprofeta. Ne Nêndeejè maalu a kukema.’”

<sup>77</sup> Babeedi’s ki kwondopiibwabo eku, makole manene’s ki kwenjiibwawu eku, kudi Nyuma umwèumwè uvwa musòmbè ne mwikale mwa kwambila Abraham ne Sarah wakaseka mu cibambalu paanyima Pende awu.

Pa dîbà adi’s tudi twela lubila ne: “Nsentedi, udi wamba bishi bwa bufuku?”

<sup>78</sup> Ki kwambaye ne: “Bufuku bûlwalwa.” Tangilaayaaku. Bufuku, dyambedi. . . Dinda ndidi dilwa, dyambedi. Pashiishe, bufuku, bulwa paabu.

<sup>79</sup> Pabwîpî menemene ne kwîsù kutookaku, kutu misangu yònsò anu bukênkè bumwepele bunene butu misangu yònsò buteekiibwe mu maulu, ne bwôbò abu ki mutooto wa mu dinda. Paudi umona mutooto wa mu dinda ukenka, wenda utamba kukenka, pa dîbà adi pa buloba padi penda patamba kushaala mîdimà. Nenku cidi cyenza ne wôwô awu utambe kukenka, mbwalu pa buloba mpatambe kushaala mîdimà.

<sup>80</sup> Nenku Ekeleeziya wa matuku a ndekeelu aa, Mubidi wa Kilisto udi mubiikidiibwe bwa kupatuka ne musungudiibwe awu, utu mulayiibwe kudi Bible ne Yèyè neabapeeshe Mutooto wa mu Dinda.

“Nsentedi, udi wamba bishi bwa bufuku? Cîikalà mwa kwenzeka ncinganyi?”

<sup>81</sup> S’ki cyôci eci. Dibutudiibwa dya mu kaabujima dilwalwa bwa buloba bujima. Kadi kumpala kwa dibutuudiibwa adi kwenzekadi, Ekeleeziya wa Yesu Kilisto neaye mu Dyambwibwa, bwa kutuutakeena ne Mukalenge Wende.

<sup>82</sup> Cidi mutooto wa mu dinda ne cya kwenza ncinyi? Ncinyi cidi cyenza ne mitooto yikenke bikole pa dîbà adi? Ndiseemena dya dîbà. Mutooto wa mu dinda udi uleeja bukênkè bwa dîbà. Mitooto mikwabo yidi yimweka bu yidi yibwicidila pa dîbà adi.

<sup>83</sup> Teoloji yônsò mikwatakaja kudi bantu ayi, mashika ônsò, bintu bya kwisùkwisù bya dibenga kucyuka maalu nebyùme byônsò. Kadi nsentedi udi musòmbè kwaka pa cibumba, pamwe ne Mutooto wa mu Dinda wawa, nealeeje Mukenji mulelela wa Mukalenge Yesu awu wíkala ne cya kuseemena kataataka, bwalu Yêyê udi utamba anu kukenka, díbà dyônsò, pakaadi díbà dibanga kujuuka.

<sup>84</sup> Kaa, ndi mufwanyine kwamba ne, mitooto ya mu dinda, juukaayi ne kenkaayi bwa butumbi bwa Nzambi, bwalu diseemena dya mîdimà ya mundankulu didi pa buloba, ne mifitu ya mupimbu pa bantu. Kadi dinda dilwalwa, ne bivwa bikengela bwa mitooto kwikalayi yifila bukênkè bwayi.

<sup>85</sup> Anji elaayi meeji bwa díbà didi dikwacisha bwôwà didi kumpala kwa baa pa buloba bujima adi. Anji elaayi meeji bwa mifitu yidi yikwacisha bwôwà yidi kumpala kwa muntu ne muntu udi kayi musungidiibwe awu leelu ewu. Matunga ônsò, ne mikuna yônsò, ne madimi ônsò ne nzubu yônsò mutubo baditumbishile amu, ne bivwijiibwe anu butu, byandamuka cyakabidi butu bwa volcan, mu katanci, mu mubunyi wa disù.

<sup>86</sup> Kadi aba badi banange Mukalenge, aba badi ne Bukênkè bwa Mutooto wa mu Dinda, bwalu mbatangije—mbatangije mèsù abo kudiYe, ne bawùmùshe ku bintu bya pa buloba! Ne bu mwakafunda Pòlò mu mukanda wende wa ndekeelu, kumpala kwa kushiyanganaye ne buloba, ùkaavwa muzengele, ne mubinduluke, ne mucyoke. Kaa, mushindu mwine wúndi ndyumvwa pa kaaba kaa mwine mwena Yuda mukese awu's we. Paakambaye ne: "Muntu nansha umwe kantacishiku to. Ndi mulwangane mviita mîmpè, ne ngaajikiji lubilu lwanyi. Ndi mulame diitabuujja. Nenku kubangila apa kudi cifulu cya butumbi cya bwakane cyampeeshabo kudi Mukalenge udi Mulumbulwishi mwakane mu dituku adi." Pashiishe kwelaye meeji ku mitooto ya mu dinda yicivwa yilwa, kwambaye ne: "Kayi umpeesha anu mêmè to, kadi aba bônsò badi banange dimweneka Dyende." Kaa: "Bandulukaayi, bupikudi bwenu bukaadi pabwipi."

<sup>87</sup> "Nsentedi, ncinyi cidi cyenza ne cibejibeji cyâmbè cyôci eci? Ncinyi cidi cyenza ne maalu a mamanya ikale ne bwôwà bwa kunyunga? Ncinyi cidi cyenza ne beena mu Pentagone biikale ne bwôwà bwa kulasula maluba?" Bwalu bantu mbafwanyine kudishipa ne kwimanshangana mfranga yabo mu misèèsù, ne bikwabo. "Ncinyi cidi cifwanyine. . . Bwalu budi cinyi? Ncinyi ciine aci? Udi wamba bishi bwa bufuku?"

<sup>88</sup> "Dinda dilwalwa." Ncya bushuwa. Biine byônsò abi bidi bwa cinyi? Mbwa dyenza dya dinda, dyenda dilwa, ne didi dyenda disaka Bukênkè kumpala. Cidi cyenza ne mîdimà ya mupimbu yilwe pabwipi menemene ne Bukênkè kubangabu kukenkeshu.



<sup>89</sup> Mêmè ndi ne disanka dyàbûngì dya kwikala mwena Kilisto. Ndi ne disanka dyàbûngì dya kwikala nsentedi Wende, umwe wabo, udi mwimane pa cimanu awu, wela lubila ne: “Dilongololaayi bwa kutuutakeena ne Nzambi, bwalu dibà dya Dilwa Dyende dikaadi dyenda diseemena.”

<sup>90</sup> Kadi wêwè, mu ekeleeziya emu mu dinda emu, kwôkò kwikale muntu udi kayi mutwishibwe ne Mutooto wa mu Dinda udi munkaci mwa kutuma Bukênkè Bwawu mu mwoyi wende, Nyuma Mwîmpè munene awu, swaku udilongolole ku cyôci aci. Bwalu kudi bwalu budi butambe bunene budi kacya kabuyi bwanji kwenzekaku to, budi pabwîpî mpindyewu mene. Tudi biimane ku mwelelu, tubandila mudibo munkaci mwa kulongolola dinaya.

<sup>91</sup> Mêmè nkaadiku mubandilebandile nsèndèmâ, mudibo mu Hollywood ne mu myaba mishiileshiilangane, balongolola manayi abo. Ne mudibo bangata banayi baabo abu, ne bikwabo byabo abi, babateeka eku ne eku. Ne mushindu mwine udibo babalongesha ne bikwabo byônsò kumpala kwa dinaya dinene adi kunayibwadi. Bikaadi anu binkemeshekemeshe misangu yônsò pântù mbibandila apu, ne pântù mumanye ne civwa ne cya kwikala nditentula cyanaana.

<sup>92</sup> Bintu byônsò bitentula ebi bitu byenjiibwe kwangacila ku bintu bya cya bushuwa. Kakwena mwa kwikala ndola wa mafi to anu piikalaku wa cya bushuwa. Kakwena mwa kwikala mwena lubombo to anu kwikale mwena Kilisto mulelela. Kakwena mwa kwikala mukenji wa mashimi to anu kwikale Mulelela. Kakwena mwa kwikala bufuku to anu kwikale mundaamuunya. Cya bushuwa!

<sup>93</sup> Nenku pâmvwà mbabandila muvwabo balongolola manayi abo awu apu, ki mêmè kudyambidila ne: “Kaa, tudi biimanyine pa cibumba pàapa, kumutu menemene kwa cintu kana cyônsò pa buloba ebu, ne tudi tubandila bibidi bya ku bintu bidi bitambe bunene; dijika dya cikondo ne Dilwa dya Mukalenge.” Abidi adi panshi aa: “Cikondo kacyakwikalaku kabidi to.” “Kakwakwikala kabidi cikondo to,” ne Dilwa dya Mukalenge.

<sup>94</sup> Nenku mufwilakanyi ne Kilisto, ùkaadi ne beena dyende bamana kuteeka kwaka. Ùkaadi ne communisme. Ùkaadi ne tusumbu tushiileshiilangane atu: ùkaadi ne bwena ekeleeziya, ùkaadi ne cyena Katolike, ùkaadi ne cyena Mishòònyì. Ùkaadi ne bintu byônsò bilongolola, bwa kwenzaye nsèndèmâ minene.

<sup>95</sup> Kadi mêmè ndi ne disanka dyàbûngì dya ne kudi Taatù mu Dyulu, mwikale Pende ne beena Dyende, bamana kulongolola, bwa diine dinaya dinene edi. Paababweja mufwilakanyi ne Kilisto mu lufu lwa bintu byônsò elu, nansha mene lwa cikondo, Nzambi mmudilongolole mu Dyende dinaya bwa kutuntumuna Ekeleeziya Wende ne kumubweja mu Cyendeleele, mu bipaapu bibenesha bya Cyendeleele, pamwe ne Nzambi Yèyè mwine.

Pa dîbà adi, mibidi ya kale mibiipe eyi neyishintuludiibwe ne neyivwijiibwe mifwanangane ne Mubidi Wende Yèyè mwine wa butumbi awu, ne dibola edi nedivwale dibenga kufwa, ne twètù netwimane mu difwanangana Nende bwa kashidi.

<sup>96</sup> Tangilaayi! Nwênù batu bàbandilà télévision, nwênù batu bateeleja cisanji, nwênù batu babala bibejibeji byenu abi, nwênù batu baswe kuteeleja maluba ne kudikonka ne ncinyi eci, teelejaayaaku diyì dyanyi: “Dinda dilwalwa, ne bufuku bûlwalwa paabu.” Dinda dilwalwa bwa aba badi badilongolole bwa dinda, ne bufuku bûlwalwa bwa aba badi kabayi badilongolole bwa dinda. Nzambi asweku alongolole myoyi yetu leelu ewu.

<sup>97</sup> “Bwalu dinda nedibwayike dya Cyendeleele ne dya kuulu kwîmpè.” Ne bu mwakamba mwedi wa kasala ne: “Basungula Bende nebasangile ku nzubu yabo dyamwamwa dya dyulu. Paabiikilabo mênà dyamwamwa, nêngiikalèku.”

Tusambilaayi.

<sup>98</sup> Mu edi dîbà didi mifitu mibwikile buloba edi, ne kabutu ku nseke yônsò, Mukalenge Nzambi, nyewu tudi. . . Katwena anu mwa kwamba patooke mushindu utudi tudyumvwa to, ne kusakidila ne kwanyisha kwa mu mwoyi wetu, muvwa Yesu Kilisto mutuuluke mufume mu Butumbi, ne muvwijiibwe muntu mufwanangane neetu, musômbèle munkaci mwetu. Ne pashiishe paakafwaYe bwa mpekaatu yetu, mupicile mu njila wa Mpaladiizo, ne mwangate misuuka yivwa mindile, mukose bukole bwônsò bwa nyuma buvwa dyabulu muswike naabu buloba, ne mwele mushoonyi, bwa nsesa ya dîbà ya ngàsà wa Cyendeleele wa Nzambi yamona mwa kukenkeshila aba badi baswe kuyaakidila.

<sup>99</sup> Nzambi, enzaku bwa leelu ewu ne, bantu myaba yônsò balwijakaje, balwijakaje, babwele mu Bukalenge, bwalu Mukenji misangu yônsò utu anu wa lukasalukasa ne: “Lwijakajaayi, lwijakajaayi, patukaayi!” Mwanjelo wakamba, mu Sodoma ne: “Ncyêna mwa kwenza cintu nansha cimwe to anu too ne pawafika kwaka.” Mukalenge, enzaku ne, Mukenji nansha mwikale mûle tente ne ngàsà, ne bukole, ne dinanga, kadi nansha nanku mbwalu bwa lukasalukasa. Enzaku, Mukalenge, bwa bantu balwe lukasa ne baakidile Kilisto ne buujiibwe tente ne Nyuma Mwîmpè. Bwalu Yesu mmwambe ne: “Aba badi baa Nzambi, badi bumvwa Mèyì a Nzambi.” Swaku bwa balwe banyingalale ku mpekaatu yabo, babatiijiibwe mu Dînà dya Mukalenge Yesu, bwa dilekelediibwa dya mpekaatu yabo, ne buujiibwe tente ne Nyuma Mwîmpè; bwa kujaalamijabo musuuka wabo mu ngiikadilu uvwa ekeleeziya wa kumpala awu, nenku ki mwikalabi paWalwa.

<sup>100</sup> Tudi ne kusakidila bwa Diyîisha, ne tulomba bwa Wèwè kuDibenesha, Mukalenge, bwa dyakalenga dya myoyi yetu,

patudi baKwindile apa. Mu Dîna dya Yesu mmutudi tulomba emu. Amen.

<sup>101</sup> [Katupa kaa mukaba wa mêyî munda mutupu. Mwimbi wa cisanji cya piano wabangi kwimba *Pèèlâbo Ngonga Yâ Ngôlo*. Muntu kampanda udi wamba ne: “Neya bushuwa ne divwa n’Diyiisha dilenga dya dikema, Mwaneetu Branham.”—Muf.]

Ku umwe ku umwe netukafike ku ciibi aci,  
Bwa kusombelamù ne badi kabayi bafwa,  
Peelabo ngonga ya ngôlo ayi bwebe wêwè ne  
mêmè.

<sup>102</sup> Kanwenaku anu baMunange anyi? Mpindyewu, diyiisha dyajiki, tuMukwuukwilaayi anu mushindu awu, mu Nyuma. Anu... Yèyè udi kaaba aka. Mêyî manene, a dîsù dyumisha, kadi mmalelela’s. Ndi ngâmba wôwò aa mu Dîna dya Kilisto. Diseemena dya dituku. Nuntangidilaayi mêmè. Ndi muswe bwa ewu. . . [Katupa kaa mukaba wa mêyî munda mutupu—Muf.]

. . . wêwè ne mêmè.

Twèlââyikù anu cyanza muulu cyanaana.

. . . kwênà muumvwe. . .

Kwêna muumvwe mudi Banjelo bimba amu  
anyi?

N’Cyanga cya butumbi cya aleluuyah.

Mu mwaba wa kule wa bupole wawa kashidi,  
Anu dyamwamwa dya musulu udi ubalakana,  
Peelabo ngonga ya ngôlo ayi bwebe wêwè ne  
mêmè.

<sup>103</sup> Padiye wimbulula cyôci aci apu, tulabulanganaayi anu ku cyanza ne muntu kampanda udi ku luseke kwebe awu! . . . ? . . .

. . . wa bupole wawa kashidi,

Anu dyamwamwa . . .

Peelabo . . . kukafika ku mwelelu awu anu ku  
diitabuuja . . .

<sup>104</sup> Ambilanganaayi anu muntu ne mukwende ne: “Mwena lwendu, ndi ne disanka be dya kwikala neebe.”

. . . umwe netukafike ku ciibi aci,

Bwa kukasombelamù ne badi kabayi bafwa,  
Peelabo ngonga ya ngôlo ayi bwebe wêwè ne  
mêmè.

Kwêna muumvwe mudi ngonga yidila  
mpindyewu amu anyi?

Kwêna muumvwe mudi banjelo bimba amu  
anyi? (Ncinyi ciine aci?)

N’Cyanga cya butumbi cya aleluuyah.

Mu mwaba wa kule wa bupole wawa kashidi,  
Anu dyamwamwa dya musulu udi ubalakana,  
Peelabo ngonga ayi . . .

<sup>105</sup> Aci cyăfumu ku dintwadila anu cintu kampanda mu meeji aanyi emu. Mukajaanyi, udi paanyima pàapa wawa, mmucivuluke bîmpè. Ngâkapetakù dyêsè dya kuya kakumbula ekeleeziya wa kale wa Pisgah awu, cilongelu cya Bible cya mu Californie. Mêmè kwenza naabo disangisha dya diloolo dimwepele. Awu's nnzubu wa nzembu wa kale, wa ku cibangidilu. Mwaba mulenga wa kacya! Mêmè kutwilangana ne mpaasata, Mwaneetu Smith. Nudi bamanye's, batu batuuta cibejibeji ku cyamu. Mbapete dikwacisha kampanda. Kabatu basangisha milambu to. Bintu byônsò bitu kabiya bya disumba to. Ne bôbò biine bakaadiku kukaadi bidimu makumi ataanu ne bya mu njila. Wâkabîbanga uvwa nngangabuka kampanda uvwa mulema, mulwe ku Californie aku ukeba pende dikwacisha. Ngangabuka kwambaye ne: "Kakwena cya dikwenzela nansha cimwe to."

Ngeela meeji uvwa n'Docteur Price ufwile ewu anyi muntu kampanda, wâkamusambidila's, kuulu mu cibambalu mu dinda kampanda. Kaakapeta bipeta anu dyakamwe to, mwakamwekabi, pa dibà adi. Aci kacyna ne mbwalu to. Pa nanku, kupatukaye. Kwambaye ne: "Mushindu kampanda, anyi kansanga, mêmè ndi ngiitabuuja, nansha nanku." Kadi mmwenze anu ubanga ne ambulule dikàsà bwa kwela cidya kupatuka mu kajila amu anyi, mukolo wende wa bulema awu wumba wololoka. Ki kwasaye Pisgah Home awu.

<sup>106</sup> Diloolo kampanda mvwa nsanganyiibwamu, nyiisha. Bantu bavwa bapate patapata mu dibalaasa dinene adi, ne nkama kuvudija ku nkama bavwa biimane mu myaba yônsò mu mîsèèsù amu ne bikwabo, muvwabo babwelela lwà paanyima apu. Nenu Diiyiisha ndyene anu dijika, cintu kadi kwenzeka's, bintu bibidi bîmvwà nciyiku mwanji kudimwena kwine kwônsò aku to kacya bandela. Bôbò kabavwa anu musumbà wa bantu bavwa baswe kwenza mutooyi mupitepité bûngi to. Kabavwa musumbà wa bantu bavwa bàshààla anu kacya bààsomba, buumakane to. Bôbò bavwa bantu buujiibwe tente ne Nyuma. Nenu bwobumwe bulenga bwa dikema abu bwakansankisha be. Nenu patukaavwa . . .

<sup>107</sup> Anu kumpala mene kwa ne mbanje bwa kusambidila babeedi, kubangabo kwimba cintu kampanda cya bituulubituulu mushindu awu. Ki mêmè kjujuuka, ne kukema be. Mêmè kwamba ne: "Kudi cintu kampanda cidi munkaci mwa kupitakana mwaba ewu. Ncyêna ngumvwa to." Nteeleja cyakabidi, mêmè kuumvwa korale yibidi. Mêmè kwamba ne: "Kudi ne cya kwikala cintu kampanda cidi kaciya cyenda bîmpè to." Ki mêmè kukupa mutu. Nenu, ku maci aanyi, cyakabidi. Mêmè kwamba ne: "Éyi Mukalenge, pàmwăpa mēyi a korale ewu ngadi atwa aaluka." Ngumvwa mukwabo *apa*, lwà kuulu, lwà muulu menemene mu nsongo ya bimanu bya mùsongà mwamwa. Mêmè kwamba ne: "Cidi ne cya kwikala mmuulu

mwamwa.” Ki mêmè kupatuka kuumuka mu citangu cya bambi amu, kubàndila lwà apa kuya pa kaaba katumbuke kaa korale aku. Civwa ndwà muulu mwamwa.

Nenku mêmè—mêmè kwambila mukajaanyi, kwamba ne: “Udiku peebe umvwa aci anyi, munanga wanyi?”

Yèyè ne: “Ncinganyi ciine aci?”

“Mwaneetu wa bakaji Arganbright,” mûngààkambà, “udiku peebe muumvwe aci anyi?”

Yèyè ne: “Eyo. Ntu nkaadiku mucyũmwè musangu kampanda, mu nsòmbelu wanyi.”

Mêmè kuya tamakatamaka too ne kudi Mwaneetu wa balume Arganbright: “Udiku peebe umvwa aci anyi?”

“Eyo.”

<sup>108</sup> Bantu bônso ne mitu yabo miinyika, munkaci mwa kwimba. “Kaa,” mûngààkambà, “pàmwàpa... Ndi—ndi muswe kutwishiibwa. Ncyèna muswe kwikala mwena kwelakana to, kadi, Mukalenge, piikalabi ne mêmè ewu ndi ntemu Webe, piikalabi bikengela bwa mêmè kwikala nsentedi, bikengela ngiikale mumanye bìndi ngamba. Bikengela ngiikale mutwishiibwe bwa cyôci eci.”

<sup>109</sup> Bu mudi dyondopa dya kudi Nzambi’s, nciyi mutwishiibwe to, ncyakwambaku kantu nansha kamwe pa bwalu abu to. Mêmè nciyi mutwishiibwe ne eci n’Dilwa dya Mukalenge to, ncivwaku mufwanyine kwamba kantu nansha kamwe pa bwalu abu to. Bikengela ngiikale mutwishiibwe.

<sup>110</sup> Mêmè kwalukila cyakabidi kwinshi mu citangu amu. Bônso bavwa anu ne mitu yabo miinyika.

<sup>111</sup> Ne dibiikila dya ku cyoshelu, bantu bààbûngi biikale ne byanza byabo bishindikila ku dididiishi aku, balwa kudi Kilisto. Nenku bavwa munkaci mwa dimba. Ndi mwenze anu mpwekela lwà apa, mêmè kwamba ne: “Mukalenge, kabyena mwa kwenzekaku to. Aba bantu badi munkaci mwa kwimba lwà panshi *apa* aba’s bavwa anu bantu beetu baa patupu aba, kadi eci lwà kuulu *eku’s* civwa cyumvwika anu bu ne civwa ndambu wa... Pàmwàpa binunu bibidi anyi bisatu bimba, *apa*, kadi bivwa bimweka anu bu ne nkufwanyine pàmwàpa kwikala binunu lukama biikale kuulu *kwaka’s*.” Nenku civwa kamwe kaa ku tuumèyì twa tutambe kubwengeteka, twa tutwe ngwengwengwe tubànde bikole atu, cyenze bu tuumèyì twa bantu bakaji. Mêmè kuteeleja, ne mubidi mujima kumvwayila.

<sup>112</sup> Mêmè kwalukila cyakabidi ndambu paanyima. Mêmè kuteeleja. Mêmè kubànda, kuulu. Kwalukila, bwalu bavwa bôbô anu batungunuke ne kwimba mu Nyuma. Mêmè kuteeleja cyakabidi. Kacivwa ndiyi *edi* to. Mvwa mwa kubumvwa bôbô lwà panshi *apa*, diyi dya mushindu kampanda; kadi edi lwà kuulu *eku*, diyi dya mushindu mukwabo.

113 Nanku paakalwa disangisha kujika, mêmè kwambila mpaasata ne: “Mpaasata, ndi muumvwe cintu kampanda cya pabwaci’s.”

Yêyè ne: “Civwa ncinganyi aci, Mwaneetu Branham?”

114 Mêmè ne: “Ndi muumvwe tuu—tuumêyi twa tutwe ngwengwengwe twa bantu bakaji, tuumêyi twa tulongolola mu mushindu wa mutumbuke, twa tutambe kulenga twa dikema tûntù kacya nciyiku mwanji kuumvwa to kacya bandela, kuulu lwà *mwama* naka.”

115 Yêyè ne: “Bakaadi bacyũmũmvwe misangu ne misangu mwaba ewu, Mwaneetu Branham.”

116 Mvwaku mubale pa bidi bitangila maamù kampanda mukole. . . Kaa, nyewu ngăpù dînà dyende mwoyi mpindyewu, uvwa ne ciibidilu cya kusambidila babeedi awu. Nenku diloolo dikwabo pakaavwa mpaasata mujikije diyisha dyende, maamù mukese awu kupwekaye bwa kuya kasambidila babeedi. Úvwa ne bânà bakese bataanu anyi basambombo nanku, biikale nende. Kadi kwimanaye ne kuteelejaye kuulu. Mwine awu m’Mandamu Woodworth-Etter, piikalabi ne nukaadiku bônso babale mukanda wende. Nenku kuumvwaye, kwambaye ne: “Korale wimbila kuulu kwa misambu yidibo bimba mu ekeleeziya.”

Paanyima paa mêyi awu mamane kuumuka, lwà panshi *apa*, kacya Cyatungunuka anu ne kwimba, nwamonu’s. Nenku wôwò mwaba awu ki wũmvwà mwimanyine.

117 Nenku anu piine apu, lwà paanyima menemene mundekeelu mwa citanda amu. . . Nudi numona muvwabi mu bulongame, mu bupwangane anyi? Mpindyewu, mêmè—mêmè ntu ngiitabuuja bulelela dyakula dya mu myakulu. Ndi ngiitabuuja ne ndipà dya kudi Nzambi, diikale mu ekeleeziya. Ndi ngiitabuuja ne batu bakwatekwate naadi mudimu bibi anu mukaadibo bakwate mudimu bibi ne Mifundu mikwabo amu, kadi kutu cya cilelela. Eyowa. Kadi muntu kampanda kajuukaye lwà mundekeelu mwa citanda, lwà mundekeelu menemene mwamwa, ne kwambaye mêyi matwe ku anaayi anyi ataanu nanku awu mu mwakulu mwenyi. Kabiyi—kabiyi anu. . . Civwa ngumwe wa—wa ku mishindu kampanda ya mwakulu. Muvwa mushindu wa wêwè kuumvwa. Bantu bônso bavwa bapuwe.

118 Ki Cintu kampanda kungiikila, kacya mêmè ncivwaku ne dyandamuna dya myakulu to, kacya bandela. Nenku ncyakakwata naadi mudimu pa dîbà adi to, bwalu mvwa muumvwe bwôwà. Bintu abi mbya Nzambi. Kabyena bikengela kunaya naabi to.

119 Ki Cintu kampanda kungambila ne: “Mpaasata neasambile disambila dya diitabuuja.” Kukengelabi bwa mêmè kushaala mubute mishiku. Ki mêmè kushaala mwindile. Kadi ki Cyôci

cilwalwà cyakabidi eci, divwala dilwa mwaba awu, dyamba ne: “Mpaasata neasambile disambila dya diitabuuja.”

120 Mêmè kudyambidila ne: “Mukalenge, paanyi nyewu nciyi ne ntu ne dipà dya dyandamuna dya myakulu. Dyanyi mêmè ndya kusambidila kwa babeedi, nenku ncyèna ne dipà dya dyandamuna to.” Ki mêmè kushaala cyakabidi mubute mishiku ne kushaala mupuwe.

121 Nenku anu mwaba awu mpaasata ukatamuka ne ubanga kusambidila babeedi. Kaa, Yèyè’s udi Nzambi! Mâsaamâ kwondopiibwawu, mu citanda cijima amu, myaba yônsò. Ncinyi aci? Dicya dya bufuku’s. Kucidi kushaale kaaditamba kakese. Kanutacishi meeji to. Kacyapu Nzambi katu mushaale kayi ne ntemu to.

122 Ndi mutwishiibwe mpindyewu ne bintu binene bidi kabiyi byumvwika, mu mwaba kampanda, pâmwâpa kabiyi anu mu dîyi dya Banjelo to, kadi cintu kampanda necifikisheku ngènzâmpèkââtù yônsò, kwôkò kwikale wa nanku mu citanda emu, ku dimanya ne bufuku bukaadi bwenda bushaala anu kushaala bwa mifitu mikole panshi paa buloba, ne mifitu ya mupimbu. Kadi Dilwa dya Mukalenge dikaadi pabwîpi, ki ciine cidi cibyenzeja aci. Nenku mêmè bu nsentedi wenu, ndi mufwanyine kwamba ne: “Dinda dilwalwa.” Ikalaayi badilongolole, nwênù mitooto ya mu dinda, kenkaayi!

123 Mbanganyi badi baswe bwa kubavuluka mu disambila dya ndekeelu kumpala kwa twètù kuya? Ela anu cyanza cyebe muulu cyanaana.

124 Nzambi munanga, Wèwè udi mumone bantu padibo beele byanza byabo muulu apu. Ne bôbò biine badi ne meeji matooke mu cyôci eci. Bàâbûngî baa ku badi bâkenketà mu bibejibeji, bàkaadi bakenkete beena nkindi, mikanda ne tuumaalu twa bintu kabukabu, kadi kabayiku mwa kupeta dyandamuna to. Kadi’s ndyedi dilwa, mu dinda emu, mu Bible. “Dinda dilwalwa, ne bufuku bûlwalwa paabu.” Nenku nyewu tulomba, Nzambi, bwa Wèwè kubeneshaku muntu ne muntu kaaba aka, badi beele byanza byabo muulu aba. Ne Wèwè ngudi mumanye cidi paanyima paa cyanza cidi cyela muulu aci. Nenku, Mukalenge, mêmè ndi ngiitabuuja ne anu mwaba mene udibo basômbe mpindyewu awu, ne Nzambi utu myaba yônsò awu mmukumbane kubaabanyina bumpyanyi bwabo bwa Nyuma budibo bakeba pa dîbâ edi abu. Ubape muntu ne muntu, Mukalenge. Bwa bwalu bwa Dîyi Dyebe ne bwa dijinga dyabo, ne bwa mulayi Webe wa Nzambi udi kawuyi mwa kupangila awu, swaku bapete cidibo beelele byanza muulu aci, pândi mêmè ndambula disambila edi pa kaaba kaabo apa. Mu Dîna dya Mukalenge Yesu, swaku bacipete. Amen.

Nzambi ikale neenu.

<sup>125</sup> Mpindyewu tudi anu ne ndambu mukese wa dībà bwa... Mpindyewu tudi baswe kusambidila babeedi. Ndi ne disanka dyàbûngì dya kumanya ne kudiku ditekemena bwa babeedi. “Mémè ndi Mukalenge Udi ukufwila luse ku bubu bwebe bwònsò, Udi ukwondopa ku màsaamà ebe ònsò.”

<sup>126</sup> Nenku mémè, anu mudibi bya kukema emu, mvwa musakiibwe kukaadi katanci, kudi maamù mutekete kampanda udi mulaadika mu kalaalu kaa dyambwila babeedi aka. Wa bwalu yêyè mmukwata kudi—kudi dîsaamà dya kansere kaa Hodgkin. Ne ndi ngeela meeji ne mamwëndè ngudi musòmbe nende mwaba ewu ewu. Ndi mutwishiibwe menemene. Eyo, ncyà bushuwa ne, maamù ewu uvwa ungambila bwa mwanende ewu, ne mémè mvwa nteeta bwa kumukoleshaku ku mwoyi.

<sup>127</sup> Nenku anu dibiikila, kabidi, paanyima paa diyisha edi. Ndi mémè ndyumvwa ne lupandu ki cintu cidu cya kumpala. Dyondopa didi pa kaaba kiibidi. Dyondopa ndifwanyine kushaala too ne kundekeelu kwa mwoyi webe wa panu, bidimu byàbûngì. Ndifwanyine kukupa dicyonkomoka ne disanka paudi panu pa buloba, kadi nedijike ne lwebe... ku lufu lwebe. Kadi musuuka udi musungidiibwe, udi ne Mwoyi wa Cyendelele. Kawenaku mwa kubutuka nansha, anyi nî ncinyi nî ncinyi kacyenaku mwa kukunyengawu to. Mmukabwele mu Mikanda ya Nzambi, bwa wêwè kjuudiibwa ku matuku a ndekeelu. Cintu cinene ncintu cya kumpala ne: “Dyambedi, Bukalenge bwa Nzambi ne bwakane Bwende, bikwabo bintu nebifidiibwe bu nsakidilu.”

<sup>128</sup> Ndi muswe anu kufila bujaadiki bumwepele cyanaana bwa dyondopiibwa dya dîsaamà dibi menemene didi mukaji mutekete ewu usaama edi. Nenku kukaavwaku cikondo kampanda... Bòbò biine badi mwa kwikala mwaba ewu mu dinda emu. Mémè ncitu apa misangu mipitepité bûngì bwa kumanya kampanda anyi kansanga to. Bààbûngì beenu ncyèna mubamanye to. Kadi kuvwa nsongaakaji kampanda wa citende mwaba ewu mu cilongelu cyetu cibandile. Nenku ùvwa usaama dîsaamà dya kansere kaa Hodgkin edi, nenku kuyabo nende kwa ngangabuka kampanda, bwa mapondo manene àvwa àbwayikà pambidi pende. Nenku kukosabo kapesa kaa dipondo e kukatumabo, bwa kujandulabo ne civwa ncinyi. Ki dyandamuna kwalukila ne: “Ndîsaamà dya kansere kaa Hodgkin didi kadiyi mwa kwondopiibwaku to.”

<sup>129</sup> Kadi maamù kavwa muswe bwa mwànà kumanyaye ne lutatu lwende alu luvwa cinyi to. Ki bangangabuka kubelabo anu maamù awu bwa kumulekelaye anu utungunuka ne kuya mu kalaasa, bwalu ùcivwa ne matuku anu makeke a kwikalaye ne mwoyi. Ndekeelu wa byònsò ditu dibwayikila ku mwoyi. Ne diine dîsaamà dya Hodgkin adi ditu nkansere, tutu bamanye aci, mu mmwenekelu kampanda. Pa nanku kupingajabo nsongaakaji wa—wa citende awu mu kalaasa, mwindile lufu.



130 Maamù ukaavwa mubinduluke. Ki kumbiikilaye ku telefone, kwambaye ne: “Ndi muswe ndwe nende. Kadi ndi muumvwe, Mwaneetu Branham, bamba ne mu milongo yebe ya babeedi, misangu yàbùngì, utu uteela mènà a masaama padi busonsodi bwa Nyuma bukuvwila.” Yèyè kwamba ne: “Udiku mwa kwikala ne musangeelu wa ne, bu Nyuma Mwimpè mwa kusokolola nî ncinyi nî ncinyi pa bidi bitangila mwànà awu, kuyi mwa kucyambaku anyi?”

131 “Ee,” mûngààkambà, “ncyèna ngeela meeji ne Yèyè mmufwanyine kucisokolola to, bu Yèyè kayi muswe bwa cyòci kumanyika.” Mêmè ne: “Ncyèna menemene ngeela meeji nanku to. Ne mu tabernacle wanyi mêmè mwine emu, mu mpuukapuuka mmûntù ngenza masangisha a mushindu awu.” Mêmè ne: “Ntu anu nsambidila babeedi cyanaana.”

132 Ki nsongaakaji wa citende awu kubwelaye mu mulongo. Nenku mêmè kukonka maamù awu ne: “Wèwè udi mwena Kilisto anyi?”

Yèyè ne: “To.”

Mêmè ne: “Nsongaakaji ewu mmwena Kilisto anyi?”

“To.”

133 Mêmè ne: “Awu’s mmushindu mubi be wa dyumuka pa buloba.” Ki mêmè ne: “Kwadyakumumonaku kabidi to, yèyè anu mudidinge muye mu mushindu awu.”

134 Nenku paakabwela inàbànzà mutekete awu mu cibambalu amu mu dinda amu. . . Ki kupicilaye anu kaaba kamwekamwe kavwa nsongaakaji wa citende ewu mupetele disambila aku; ki mwikalabi kabidi bwa nsongaakaji ewu, mu tusunsa tukese emu. Mêmè kumukonka. Mvwa mumumanye. Ki mêmè kwamba ne: “Wèwè ki nsongaakaji wa citende wa mu cilongelu cibandile cya muneemu aci awu anyi?”

Yèyè ne: “Mmêmè.”

Mêmè kwamba ne: “Udi mumanye bìmpè disaamà dyûdi naadi anyi?”

135 Yèyè kwamba ne: “Bangangabuka badi bangambila ne bôbô badi beela meeji ne nêngûmvwè bìmpè.”

136 “Ee,” mûngààkambà, “kadi wèwè kuyi muumvwe bìmpè? Udi mwena Kilisto anyi?”

Yèyè ne: “To, mukalenge. Ncyèna mwena Kilisto to.”

Mêmè ne: “Udiku mwa kuswa bwa kwikala mwena Kilisto anyi?”

Yèyè ne: “Ndi mwa kuswa.”

137 Ki mêmè ne: “Udiku mwa kuswa bwa kufila mwoyi webe kudi Kilisto anyi?” Ki kwambaye ne ùvwa muswe. Ki mamwëndè kulwa lubilu kwamba ne ùvwa pende muswe. Ki kwenzekabi

ne, mêmè kubabatiiza bônso babidi anu kaaba aka mu ciina cya màyi emu. Mêmè kusambidila nsongaakaji awu.

<sup>138</sup> Nenku cikondo kupitaci. Ki ndekeelu wa byônso nsongaakaji awu kubangaye wenda umvwa bîmpè, paanyima paa ndambu wa matuku, kayi mumanye ne civwa lutatu ncinyi to. Nenku paanyima paa cikondo, kupinganabo nende bwa kumuteetabo, kadi kabayiku mwa kusangana kamanyinu kaa disaamà adi nansha kamwe to, nansha kakese. Kudi . . .

<sup>139</sup> Ncitu muswe kwamba maalu matambetambe bunene a bantu to, kadi ntu muswe kwikala ne meeji matooke kudi bantu. Kudi muntu mulume mu cimenga eci, mmuntu mumanyike bîmpè, mwikale mwaneetu mwena Kilisto mulenga maalu, patupu kavwa mwa kwikala mulami mu ekeleeziya ewu to. . . Ndi muswe kwamba ne, mulubuludi wa mu ekeleeziya. Ne yèyè mwine udipu mpindyewu. Nenku yèyè nguvwa mudyângacile bujitu bwa kwenda kulondesha bwalu bwa nsongaakaji awu. Bivwa mpaanyima paa bidimu, bidimu bibidi anyi bisatu paanyima, paakalwa nsongaakaji awu kujikija kalaasa kende ne kubangaye kuseeselangana ne nsongaalume kampanda.

<sup>140</sup> Ki mêmè kutuutakeena nende mu mùsèsù dîngà dituku, nenku mwikale ne disanka dyàbûngì, ne kufilaye bujaadiki bwa butumbi ne bukole bwa Yesu Kilisto, paanyima paa bamane kumwambila ne civwa ncikampanda. Nsongaakaji awu ukaadi musediibwe. Ûkaadi ne bânà. Ne ùdi ne nsòmbelu wa mwikale mu disanka.

<sup>141</sup> Ne tatwëndè utu ulwa ku mwaba wa mudimu wa muntu ewu, bwa kumukosabo nsuki. Ne Mukalenge Egan ewu, yèyè ki—ki udi mutungunuke ne bwalu bwa disaamà abu kubangila anu kwine kwônso aku. Ne nsongaakaji awu udi bilenga ne mubidi tumatuma. Ne ciine aci nkubangila ku dîbà kaayi, Mwaneetu Egan? Kukaadi bidimu mulongolongo, kî mmwômò anyi? [Mwaneetu Egan udi wamba ne: “Kukaadi bidimu binaayi, bitaanu, anyi bisambombo.”—Muf.] Nenku yèyè udi ne mwoyi leelu ewu, bujaadiki bwa ne Nzambi utu wondopa disaamà dya kansere kaa Hodgkin.

<sup>142</sup> Kaa, mbilenga be bwa kumanya ne, mu mêmè a dikenga, tudi ne cinyeemenu. Ciine cinyeemenu aci n’Kilisto.

<sup>143</sup> Ndi muswe kulondaku anu bwa. . .kulondela bakwabo baa kunudi, kaacintu kampanda kakese mu disangisha, kadi kafume ku dzenzeka. Mukalenge mmudileeje mulenga be mu dyandamuna dya masambila enu bônso, pândi muye ku Wesete bwa disangisha anu mpindyewu apa, kukaadi ndambu wa mbingu, mbingu yibidi. Nenku patuvwa tusanganyiibwa mu Tulsa, mu cibilu aci, bivwa bikengela bwa mêmè. . .Ncivwa ne cya kuyiisha to, bwalu. . .bivwa bikengela bwa mêmè kwenza disangisha kuntwaku. Kadi kuvwa bambi biikale benza matabuluja makwabo, pa nanku mêmè ncivwa mwa kwenza

disangisha pa dîbà adi to. Kadi mêmè kupicilaku, bwa kwangata Mwaneetu Arganbright, bwa kuya nende ku Californie; mêmè ne mukajaanyi, ne Joseph mwânà.

<sup>144</sup> Nenuku diloolo adi, patwakakufika dîbà dimane kupita, mêmè kuumvwa bamba ne Oral Roberts ne Tommy Osborn bavwa ne cya kuyiisha diloolo adi. Nanku ki Mwaneetu Arganbright kubiiikilaye ku bilaala-beenyi too ne mwakalwaye kusokolola mwaba utuvwa tusanganyibwa, ki kwambaye ne: “Lwâku tuye mu disangisha.” Nenuku kulwaye, yêyè ne Mwaneetu Sonmore, Beena Kilisto baa Kantu-ku-byanza, mfumu wa dyâpâ dya Minneapolis. Bôbô—bôbô kulwa bwa kunkeba.

<sup>145</sup> Ki mêmè kubwela’s, ne bôbô bakaavwa bamane kubanga didya dya mundaamuunya anu kwine kwônso aku, mu—mu cibambalu cyalabale cya dijiila maja cya ba-Mayo, mwaba munene. Bantu beena miliyô ne miliyô ya ndola bavwa basômbe muntwamu. Nenuku’s nudi anu bamanye mûmvwà mêmè ewu mwa kudyumvwa pa kubwela mu mwine mwaba wa nanku awu awu. Ncivwa nansha mumanye ne twele ne nsomo bivwabo naabi pa meesa abi bivwa mbya dikwata bishi to. Kadi mêmè kumba anu kubwela’s.

<sup>146</sup> Nenuku pâmvwà ngenda mbwela apu, Oral Roberts nguvwa uyiisha. Nenuku ùvwa uyiisha pa bûngî bwa bintu bya kwikala naabi mu nsômbelu, tente mu nzu bu tente pambelu’s, nenuku mwikale wambila Beena Kilisto baa Kantu-ku-byanza, ne: “Yesu wakakwata mishipa, kuyeela mu bukondo, nenuku bôbô kuyipeta mipite ne pa yivwabo mwa—yivwabo mwa kukwata naayi mudimu.” Ne Mwaneetu Roberts awu mmwakudi wa mpâci’s, munudi bamanye. Ki kwambaye ne: “Idimu bûngî cyanaana bwa muntu ne muntu.” Kadi kwambaye ne: “Mpindiyewu, ndi munkaci mwa kwibaka ntempelu lwà mwaba ewu, wa uyiila pâmwâpa miliyô ya ndola.” Yêyè ne: “Mmwibakiibwe ne mabwe matooke a mafinunuke.” Ki yêyè ne: “Ndi mufike nende pa cipidi, ki mfranga paayi kumba kunjika.” Ki yêyè ne: “Pashiishe mêmè kuya dinsambu dya mùsèèsù dîngâ dituku, bwa kumubandila, kadi dyabulu kwambaye ne: ‘Udi mumanye mudi bwalu? Bantu’s nebiikale bakaadi bapicila mwaba ewu bamba ne: “Cidi Oral Roberts mwenze’s ki cyôci cyacya.””

<sup>147</sup> Kwambaye ne: “Pa dîbà adi mêmè kwambila dyabulu ne: ‘Kadi’s nebiikale ne cya kwamba ne: “Oral Roberts wakateeta.””’ Aci’s mbîmpè. Kadi kwambaye ne: “Pa dîbà adi kuteekiibwaci pa mwoyi wa mwena banki kampana, muneemu mu cimenga emu, udi munsombêshe, bu, miliyô ya ndola mitwe ku yibidi myangata ku banki, bwa kujikija diibaka.” Banki kayitu yenza aci to. Aci kaayi nwênù’s nudi bamanye.

148 Kadi kwambaye ne: “Mwine mwena kantu-ku-byanza awu, mwena banki awu, mmusòmbè kaaba aka patudi twakulangana apa.” Yèyè ne: “Ncyèna muswe kumuteela mu dînà to, bwalu yèyè kèna menemene wa mu beena Evanjeeliyo mu kaabujima to. Kadi,” yèyè ne, “ùdi kaaba aka.” Kadi kwambaye ne: “Mêmè—mêmè ncyèna ngeela meeji ne yèyè udi nansha udyamba mudiye mwena Kilisto to. Kadi,” yèyè ne, “cintu kampanda ncidì cisake mwoyi wende, ki kwenzaye bwa mpete mfranga ayi.” Yèyè ne: “Yèyè muswe kujuukila kuulu,” yèyè ne, “mmufwanyine anu kujuuka’s, kadi mêmè ncyèna muswe kuumvwija muntu awu bundu to.”

149 Muntu awu kujuukaye, kwambaye ne: “Mêmè ncyèna ngumvwa bundu to, Mukalenge Roberts,” kadi kusòmbayè.

150 Ki mêmè kubwela, nenku mvwa musòmbè. Pashiishe Mwaneetu Roberts, mmwenze anu ujikija, kulwaye mwaba wûmvwà awu ne kungeelaye mwoyi ku cyanza, ne kunkokelaye mu maboko ende. Nenku mu tusuna tukese cyanaana, pa dîbà adi, mu bushuwa bwa bwalu, bantu búngì cyanaana kadi kuseemenabo mwaba awu, nudi bamanye’s, bayiikila patucivwa tudya apu, biikale bajinga bwa ngènzè masangisha ne bikwabo, ne bambi.

151 Ki pashiishe Demos Shakarian kujuukaye. Yèyè utu mfumu wa dyâpà adi dya Beena Kantu-ku-byanza baa Evanjeeliyo mu Kaabujima. Nenku kujuukaye e kwambaye ne: “Nudi bamanye’s, mêmè ndi ndyumvwa anu mulombodiibwe bwa kwamba ne bivwa bikengela bwa Mwaneetu Branham kutuyiishaye, diloolo edi, diyiisha dya dyoya naadi.”

152 Ee, mêmè kupanga cya dyamba’s. Ki kubangaye ukaadi wakula bwa bantu pa dîbà adi bavwa basòmbè muntwamu, wamba ne: “Ewu n’*Kampanda*. Ngätwidyanganyi nende leelu.” Bavwa bandondela ne bôbò abu batu ne mpangu mijima ya myangate misèèsù yisatu anyi yinaayi ya Miracle Mile. Beena miliyò ya ndola ne bisumbusumbu bya ngombe, ne bikwabo, kadi cîmvwà paanyi mêmè ewu mufwanyine kwamba mu disangisha dya bu nanku awu ki cinganyi?

153 Kadi, nudi bamanye’s, bitu misangu yònsò anu bitambe bwîmpè bwa kutumikila’s. Pa nanku mêmè kujuuka e kwakula mwanyi paanyi mùmvwà mwa kwakula amu. Ki kundekeelu kwa disangisha... Bitu bipampalamuke bikole bwa kwenza dibiikila dya ku cyoshelu mu mwaba bu nanku awu. Kadi, nudi bamanye’s, nkaadiku mwenzenze mabiikila a ku cyoshelu ku mayiisha a ku bitalu. Pa nanku mêmè kudyambidila ne: “S’ki mpunga mulenga nyèyè ewu.” Nenku mêmè—mêmè kwenza dibiikila dya ku cyoshelu’s. Kadi ki balume ne bakaji babanji bònsò abu kulwabo kudi Mukalenge Yesu, ne kufilabo myoyi yabo kudi Mukalenge.

154 Mêmè kushaala nkacila bwa mwena miliyô mukwabo, mukaji wa mwena miliyô mwikale ne kafulu kakese, ne nsala milenga ya dikema myasa ku nyungulukilu lwà kumpenga kwônsò aku, yivwaye mutuudile pàmwápa ndola lukama. Ne bisonji bimupwekela pa matama. Kumpyaye ku cyanza, wamba ne: “Mwaneetu Branham, mwoyi wanyi mmunyungishiibwe.” Yêyè ne: “Mêmè mvwa anu ndyambidila ne ndi mwena Kilisto, too ne mpindyewu.” Kwambaye ne: “Ndi muswe kukwacila Mukalenge mudimu.”

Ki mêmè kwamba ne: “Twasakidila.”

155 Kiashiishe mu ndambu wa tusunsa, Cintu kampanda kungambila ne: “Sambidilaaku babeedi mpindyewu.”

156 Mêmè kudyambidila ne: “Akaa, bwálà. Ncyéna mwa kwenza aci to. S'nkaadi mumane kwimanyika. . . cibambalu cinene cya dijiila maja eci. Pa nanku mêmè musambidile babeedi, bôbò's nebèlè meeji anu ne ndi mukoleshi wa maalu wa menemene.” Pa nanku mêmè kudyambidila ne: “Ncyá bushuwa ne kî m'Mukalenge udi mufwanyine kungambila aci to. Pàmwápa mêmè ngudi anu musaluke cyanaana bwa dikudimuna dya mucima dya bantu aba edi, pa nanku nêndifindè mu bantu emu nkasòmbèlè panshi.”

157 Ki mêmè kupweka ngenda ndonda meesa a baakudi awu, kuya too ne kundekeelu menemene aku, ki mêmè kusòmba ne Mwaneetu Jack Moore, uvwa musòmba kaaba aku, ùyiikila. Nenku mêmè kwalujila mulombodi awu disangisha, Mukalenge Shakarian.

158 Pashiishe paakajuukaye, ki kwambaye ne: “Nudi bamanye mudi bwalu anyi?” Kaa, Nzambi's uvwa ne cya kwikala mumulenge pa dikaaya. Yêyè ne: “Ndi ndyumvwa mulombodiibwe bwa kulomba Mwaneetu Branham bwa kwalukilaye bwa kusambidila babeedi.”

Mêmè kudyambidila ne: “Kakaa, cya bushuwa menemene's.”

159 Ki mêmè kujuuka e kubalondela's. Ki mêmè kwamba ne: “Mêmè mvwa muumvwe cyôci aci. Nenku ndi ndomba Nzambi amfwileku luse. Kadi mbîmpè padi muntu ulengiibwa, yêyè pende, nudi bamanye's, bitumanyisheku twètù bônsò bwa ne ncyenzedi cya Nyuma.”

160 Pa nanku mêmè kwamba ne: “Mpindyewu, dyondopa dya kudi Nzambi kî nkulenga kwa dibaya dya bimfwanyi to. Kadyena anu cintu kampanda cya didifwanyikijila to. Cidi n'Nzambi umwèumwè wasungidi bantu bônsò aba katanci aka mwaba ewu awu. Yêyè udi Nzambi umwèumwè awu udi wondopa bantu bônsò badi mwaba ewu aba, anu ku diitabuuja dipwekele cyanaana diikale diMwitabuuja.” Mêmè kwamba ne: “Nudi nuciitabuuja anyi?”

161 Nenku mpindyewu bu munsokontu, bwa ekeleeziya wanyi. Bu munudi bamanye, mudimu wanyi wa bwambi udi munkaci mwa kushintuluka, nenku, kaa, dishintuluka dya butumbi kaayi's we! Kaa! Nwênù bônso nudi bavuluke Méyì àkaadi madiledile bu ngonga awu. Ne musangu wônso udici cyenzeka, cintu kampanda cidi cyenzeka, pânkaadi mbwelamu bwa kwakula pa bwalu abu, cilwa—cilwa kûndi ne: "Ambila mukuna ewu." Ncyenzeke bwa cinyi? Citu ndiitabuuja. Cintu kana cyônso eci citu nku diitabuuja. Diitabuuja kî ncintu kampanda cyûdi ukwatakaja to. Diitabuuja ncintu kampanda cyûdi naaci.

162 Ki mêmè kudyambidila ne: "Byôbi ne. . . Ntu misangu yônso anu ndyumvwa bundu bwa diitabuuja dyanyi, kudi bantu, pa kumona bwîmpè bwa Mukalenge."

163 Yêyè ukaadi muleejeleje maalu, mwambambe bikeena-kumona. Bintu byônso bitu anu bipwangane. Nwênù aba nutu bamanye aci. Kî mmuntu nkaaya wetu ewu to. Kî mmuntu to. Nzambi ngudi ucyenza.

Ne fôtô *ewu*, mushindu mwine udiye mwende buloba bujima's we!

Ya mu Allemagne ayi!

164 Nenku kukaadi ndambu wa mbingu mwaba ewu, pâmwâpa beenyi badi mwaba ewu aba mbatu kacya kabayi banji kumumonaku to, mbakwate mukwabo. Ndi nende kumbelu. Nduseke lwa mpala wa Mukalenge Yesu mwimane anu paanyima menemene paa mwaba wûmvwà mêmè mwimane awu. Ne byanza Byende mbyolola, ne ndimi ya Kapyra yilakukila mu cyanza Cyende, pâmvwà ngaakula pa cyena-bwalu cya ne: "Ambila mukuna ewu ne: 'Tentemuka,' kuyi wela mpatâ munda mwa mwoyi webe to, kadi witabuuja." Nenku twètù tudi nende. Mmu cyamu cya Techni-. . . meekala a Kodachrome. Ne badi nende kumbelu patudi twakulangana apa. Ne badi munkaci mwa kwenza. . . Mbamukenkete mpindyewu kudi maalu a mamanya, ne bikwabo, ne nzubu ya bilambidi bya manga. Neapatuke abidi adi panshi aa, mukwabo, byenza ne yâkûmbanyi bu yisambombo nanku mpindyewu ya mu myaba mishiileshiilangane, yikaadibo bakwate.

165 Ewu kaayi ki wa mutambe kwikala wa pabwende wa ku yôyi yônso, utubo kacya kabayiku banji kumona to. Tangilaayi mwedi Wende, mpala Wende, luseke Lwende lwa mpala, maboko Ende moolola. Ne mêmè mvwa mwimanemu anu nunku *ewu*, ne mwaba udiYe ne maboko Ende awu, kuyi mwa kumonaku kaaba nansha kakese kaa kandeeja mêmè to, mushindu awu; mutu wanyi, pashiishe makàsà aanyi panshi apu, anu mutu ne makàsà nkaayaabi, ki byônso bivwa bishaale. Nwamonu anyi? Nenku Yêyè—nenku Yêyè mmwimane ne maboko Ende moolola mushindu *ewu*. Ne mêmè ndi ne maboko moolola mushindu *ewu*, mwikale nyiisha, ngamba

ne: “Ambila mukuna ewu.” Nenku bu pa diine dîbà adi, cintu kampanda kwenzekaci. [Mwaneetu Branham udi utuuta cishonto musangu umwe—Muf.] Ki kuCikwatabo fòtô mushindu awu. Nenku’s ki Cyôci civwa mwaba ewu aci, paanyima apu, byônsò anu bya meekala pa meekala. Nenku citunga cinene, mudi Nzambi ubyakajangana amu, citunga cinene cya bilongo bya mbata wa tubeji tusongoloke citeeka pabwîpî apu.

166 Yèyè’s m’Mbata wa mu Cibanda. Nenku batu bapeta opium penyi? S’nku bilongo bya mbata. Ncya bushuwa. Ng’Opium kaayi utu nende Nzambi? Ditalala. Opium udi anu ukupwisha mwoyi ntatu yebe yônsò. Banu baa opium, mushindu awu ki utubo badishipa ne opium awu. Nzambi utu ne Opium. Amen. Udi utuuyisha mukenyi wônsò wa disaamà, wondopa bubeedi ne bubeedi bwônsò, umusha diditacisha dyônsò dya mu mwoyi adi. Patudi anu tweyelela mu Opium Wende, tudi mu ditalala.

167 Nenku bitunga binene bya bilongo bya mbata mbiteekiibwe kumpala aku, mwaba wûmvwà nyiishila awu, pa cibumba cya ku cyambilu apu.

168 Ki mêmè kusambidila babeedi, mu Tulsa amu, nenku mêmè kutuuluka anu panshi apu e kupatuka. Nenku paanyima paa tusunsa tutwe ku dikumi. . .

169 Ncyèna muswe kuteela dînà dya mutangadiki awu to. Kadi mukaji mukwabo uvwa ne binyoka bya mu mwongo, uvwa ukwacila mwine mutangadiki ewu mudimu awu, ùvwa mufundi wa mu sténo. Nenku bivwa bikengela bwa kwikalaye utuuta ku mashinyi a mikanda nunku *ewu*, bwalu maboko ende ne makaaya bivwa biswika. Ùvwa utuuta ku mashinyi nunku *ewu*. Kadi mutangadiki munene ne mumanya bîmpè uvwa mu Tulsa ewu, ùvwa mumwangate ku mudimu wende, bwa kwikalaye umupa mudimu.

170 Ki kwasaye lwendu wenda upweka mu cibambalu aci amu. Kadi dyakamwe maboko ende kudilekelelawu, ki kubangaye kutupika ne kwela mbila ya mikole, mu mushindu wa ne wakakoka ntema ya bantu bônsò kuulu aku. Nenku mukaji munanga awu udyela panshi ku binù, ne wela byanza byende muulu ne ubituutakaja mushindu *ewu*. [Mwaneetu Branham udi utuutakaja byanza misangu yisatu—Muf.] Butumbi bwa Nzambi, bwalu Nzambi uvwa mumusuulule, anu katanci kakese cyanaana paanyima paa disambila adi.

171 Ki mêmè kudifindamu, bwa kuteeleja ne kumona civwaye munkaci mwa dyamba. Kwambaye ne: “Mêmè mvwa anu ngenda mpweka mu cibambalu amu cyanaana.”

Ki mêmè kwamba ne: “Ee, twasakidila kudi Nzambi.”

172 Ki mêmè kukudimuka, kwasa lwendu mutangile ku luseke lukwabo. Ki mêmè kuumvwa, lwà kwinshi aku, kumona bangènzâmpèkââtù balwa bônsò lubilu cyapamwe, bwa kumona

ne ncilumbu kaayi aci. Kadi ki muntu udi wangata dîyì ewu, Mwaneetu Gardner, muntu mwine utu mumpe nkooci ewu awu.

173 Bààbûngì baa kunudi mbamanye Mwaneetu Gardner. Mwaneetu Gardner, mu Binghamton, mu New York, musumbishuludi mutambe bunene wa mashinyi a tudyendelandela a Oldsmobile wa bidimu bisatu bishaala ebi, musumbishe mashinyi a tudyendelandela a Oldsmobile kutamba muntu mukwabo nî nganyi nî nganyi yònsò mu États-Unis emu. Ne yêyè utu wendela mu ndeke wende yêyè wa nkaayende. Nenku kukaadi kupite pabwîpì ne cidimu cijima . . . Dîna dyende n'George Gardner. Nenku yêyè . . .

174 Mwendeshi wa ndeke wende, mwikale nkaayende, ùvwa wenda uyamu nkaayende, kudishindaye, ne ndeke. Kuzaajikaye binù, ne tupombo. Ki mikolo yende ne makàsà kushaalabi bikayabale, ki kwikalaye ukaadi wenda mushindu ewu, mwendeshi wende wa ndeke awu.

175 Nenku yêyè awu uvwapu paakenjiibwa disambila adi, ne ùvwa mupatuke nkaayende mu cibambalu muvwa didya dizenzekela amu muye pambelu. Nenku bavwa bamupetele pende cibambalu, pabwîpì apu, bwa kiikadi ne lutatu lwa kwenda bwa kutwa kwaluka to. Kadi bujaadiki bwende buvwa nunku ewu. Ùvwa muye mu cibambalu cyende ne musòmbèle panshi; kayi nanshà mwena Kilisto to. Ki kwambaye ne: “Mu mushindu kampana anyi kansanga, mèmè ndi ngiitabuuja kalumyana kaa mutu dibàla kavwa kayiishe kuntu kwaka diloolo adi aku.” Ki yêyè ne wàkabanga kumona ne bânà bende baa nkàsà baakabanga kunyunga. Ki yêyè kutupika e kwimana kuulu, mwondopiibwe mu kaabujima.

176 Mwimane pambelu apu, utumbisha Nzambi, mwimanyine kuulu's, wambuluka mikolo muulu ne panshi mushindu ewu, ne ku nseke ya makàsà ne bikwabo byònsò, mwikale anu ufila bujadiki bwa butumbi bwa Nzambi.

177 Bukwabu bwalu kabidi, kumpala kwa twètù kusambidila babeedi. Tuvwa basòmbè ne Mwaneetu Arganbright. Nenku mulunda wanyi mwimpè, Leo ne Gene, mbamanye cidi mabiikila a ku telefone ne ncinyi. Telefone udila, nenku Mwaneetu Arganbright wandamuna. Nenku, nudi bamanye's, kwènà mwa kwikala mudyàbanye to. Kadi, kwenzekabi ne, mèmè kwambula telefone.

178 Mèmè ndi ngiitabuuja ne maalu ônsò adi enzeka mu mushindu ukaadi Nzambi mudyanjile kumona. Kanwenaayiku peenu nwiitabuuja nanku anyi? Ndi ngiitabuuja ne ki bwa cinyi inàbànzà mutekete ewu udi kaaba aka. Ndi ngiitabuuja ne ki bwa cinyi nwènù bònsò aba nudi kaaba aka. Ndi ngiitabuuja ne ki bwa cinyi mèmè ewu ndi kaaba aka, ki bwa cinyi tudi badisangishe bwa butumbi bwa Nzambi, mbwa kabingila



kampana. Citudi bavwile twenda tucicila mu myaba ya mabwe a mashika ncinyi, bwa kwikala apa mu dinda emu?

179 Ki mêmè kwambula telefone, bwalu Mwaneetu Arganbright kavwa mu cibambalu amu to. Nenku awu ne: “Ndi njingaku kwakula ne Mwaneetu Branham.”

Mêmè kwamba ne: “Mmêmè Mwaneetu Branham.”

180 Yèyè awu uvwa mmuntu mulume wa ci-Espagnol. Yèyè kwamba ne: “Mukalenge, ndi mumanye ne mbwalu butatakane, pàmwāpa, bwa kwela lukonko lûndi njinga kwela elu.” Yèyè ne: “Ndi mwa kudifwanyikijila mudi bantu bakukoka, ne bikwabu. Kadi,” yèyè ne, “mêmè ntu missionnaire mu Mexique.” Ki yèyè ne: “Lwà muneemu, ndi musòmbèle muneemu mu La Crescenta. Kadi nyewu mfuma ku dyumvwa, kukaadi ndambu wa mēbà, bamba ne wèwè uvwa mu cimenga emu.” Ki kwambaye ne: “Ndi mwalukile ne mwanaanyi wa mu diboko, bwa kuteeta kufika nende kûdi wèwè anyi kudi Mwaneetu Roberts, anyi kudi umwe wa ku bânà beetu badi basambidila babeedi.” Ki yèyè ne: “Bu mudibi ne mmwanaanyi mulela, diitabuujā dyanyi, ngeela meeji ne, ndishaale anu ditekete ndambu.” Yèyè ne: “Mwine mwanaanyi wa mu diboko awu kī mmwanji kukumbaja ngondo yinaayi to kadi nyewu ufwa kansere.”

Ki Cintu kampana kungambila ne: “Nda kudi mwânà awu.”

181 “Ee,” mûngàākambà, “mukalenge, nêngàngatè Mwaneetu Arganbright, nenku wèwè umwambile mwaba udi mwânà mwine awu usanganyiibwa, nêntuutakeenè neebe.” Pa nanku kwangataye. . . Mêmè kwangata Mwaneetu Arganbright, nenku kumwambilaye.

182 Ki twètù kubwela mu mashinyi ne kuyaku. Nenku mêmè kutwilangana ne mukajende mutekete awu. Pende mwikale mwena Mexique, kadi kayi ne mmwenekelu awu to. Ûvwa ne dikoba ditooke, dya tòò, kadi ùvwa mwena Mexique. Bitu ne, beena Mexique, misangu yàbûngi, batu ne nsuki ya mvwangala, bwalu badi pankaci paa ba-Espagnols ne ba-Indiens. Kadi kutu bamwe baa ku beena Inde batu anu ne nsuki ya mvwangala, mitooke bu nêjè. Kadi mukajende uvwa yèyè mwena Finlande, wa nsuki ya mvwangala pa mvwangala, mukaji mutekete wa kalolo kaa menemene.

183 Ki mêmè kuya ne mulume awu ku lupitaadi, bwa kamona mwanende wa mu diboko awu. Ndi mwenze anu mbwela mu cibambalu amu, bavwa bamuteeke anu pabwîpi menemene ne birô bya baaminganga. Bwalu, mwânà mukese awu, nansha mucivwaye anu ne ngondo yinaayi amu, kadi ùvwa mulediibwe ne byûjâ bya kansere kaa lufu mu mbanga yende amu, bivwa byûle mu ntanta wa wipacila *apa* ne kwîsù kwende, mushindu *ewu*, bipatuke anu mushindu awu. Nenku bangangabuka bakaavwa bateete kupanda. Nenku bibangu binene byondo

bivwa bikoseke mu nyungulukilu yônsò wa muminu wende awu, ku nyungulukilu kwônsò aku. Aci kacyakakiimanyika to; cikaavwa anu cikakabweje too ne mu ludimi lwende amu. Nenku tubanga tukese atu tulebelele nunku *ewu*, ne bibangu binene byonduke abi. Nenku kaaludimi kende kakese aku. . . Kakana kakese aku kakayiku bunene bupite *apa* to. Kadi ludimi lwende alu, pàmwăpa bunene *ebu*, lûle, lupatuke pambelu lwamba kutwa ne *apa*, ne lushaale lufiike. Nenku lukaavwa lukajike dyeyela dya mu mimpempe pavwalu lupwekela kwinsi, pavwalu lûle lukatwe ne muulu mu cilakalaka cya mukana mwende amu. Ne mu bushuwa bwa bwalu, luvwa lukosa dyeyela dyende adi, kuumukila *apa*. Byakakengela bwa kutubulabo disoso mu muminu mwende amu. Ne kuvwa kashiba kakese kaa nnanì mukese. . .byenze bu kakopo kakese kaa cijengu pa muminu wende apu. Ne tuboko twende tukese atu tuvwa tuswikila mu mabaya, mushindu *ewu*, bwa kapeci mushindu wa kwolola cyanza kupatula kashiba aku to; civwa cifwanyine kupacisha mweyelu. Nenku kansere aku, bu muvwaku kazonza mashi, bivwa bikengela bwa munganga kwikalaye mwimane mwaba awu ne cintu kampanda bwa kwikalaye ukoona mashi avwa kansere kazololwejila mu kashiba awu, cyanaana bivwa mwa kumupacisha mweyelu yêyè mufwanyine kufwa.

<sup>184</sup> Ki taatù kunyungulukaye e kuya ku luseke lwa kalaalu, e kwambaye ne: “Ricky, mwânà mukese wa balume wa papa!” Yêyè ne: “Papa mmulwe ne Mwaneetu Branham bwa kukusambidilaye, Ricky.”

<sup>185</sup> Mmwenze anu wamba ne: “Mwânà mukese wa balume wa papa,” ki nyuma wanyi kunguumukaye. Ncicivwaku mwa kucitwala kabidi to. Kukengelabi bwa mêmè kwikala nkaadi anu kacya ngaakwata ku luseke lwa kalaalu aku. “Mwânà mukese wa balume wa papa.” Ki mwânà mukese awu, nansha mucikàle anu mwânà muvwaye amu, wakajingulula ne uvwa m’papa wende. Ki kubangaye ukaadi weyela bya byela kashiba mushindu awu, ne tuboko twende tukese atu mushindu awu. Ne yêyè mwikale uteeta bwa kutuuta mwânà mukese awu cyanza ku mutu. Mwânà mukese wa mu diboko wa balume mukwate ne bya luse, mulela mu mushindu awu’s. Mêmè kadi kupanga ne mwa kwakula’s. Mvwa anu. . . Nudi bamanye’s, udi ushaala mupatakane anu menemene, mu mushindu wa kuyiku ne mushindu wa kwamba bwalu nansha bumwe to.

<sup>186</sup> Mêmè kutuma mèsù panshi, kumona tuboko tukese menemene atu tupatukile mwinshi mwa mabaya awu. [Mwaneetu Branham udi weyela bya byela kashiba—Muf.] Nenku mwikale upatula kashiba kaa mu dyeyela aku. Ki mêmè kudyambidila ne: “Aci kacyenaku cyenza luse anyi!”

<sup>187</sup> Nenku paanyima paa mêmè mumane kwalukilaku mu mêmè mu mushindu kampanda, bikumbane bya ngeelaku meeji ku cintu kampanda, mêmè kudyambidila ne: “Yesu, Wèwè mwine

muwãmbi ne Udi upeta disanka pa kumona aci anyi? Mêmè ncyêna mwa kuciitabuujuaku to. Ncyêna anu mwa kwitabuuja ne Wêwè udi upeta butumbi ku mushindu udi mwânà mukese wawa ukenga nansha. Kabyena anu mwa kwenzekaku to. Piikalabi ne mêmè, ngènzâmpèkâàtù ewu, bingenza ne ndyûmvwè mûndi ndyûmvwa emu bwa mwânà wawa, ncifwanyine kuKwenza cinyi, Wêwè mushimi wa luse lwônsò? Cidi ne cya kuKwenza cinyi?” Nenku ncivwa mwanji kwamba mèyì nansha makese to.

<sup>188</sup> Yêyè uvwa uteeta kumunayishaku, bwa kumona mwa kumutuuyishaku cilunji. Ne kaamubidi kende kakese aku keela kaamukaaya kakese, anu bu...Kaamubidi kakese aku, ne byônsò, kabiya bipita bunene *ebu* to. Ne mutu wende nguvwa citupa cya citambe bunene, lubanga lwende lûle lushaale lunene lwa dikema. Nenku bavwa baswike cintu kampanda cinyungulukile mutu wende awu, bwa ne mutu wende mukese awu kawikadi walwa kutaayika. Nudi bamanye's, mukusu; mbàngâ yende yivwa myûle midyundakanangane, mipatuke mushindu *ewu*, bwa kuwupangisha bwa kutaayika. Nenku munganga uvwa mwimane mwaba awu.

<sup>189</sup> Nenku mêmè kutuma mêsù panshi kudi mwânà mukese awu, mêmè kudyambidila ne: “Mukalenge, cyûvwà Wêwè mufwanyine kwenza ncinyi bu ne Wêwè ngvwa mwimane kaaba aka?”

<sup>190</sup> Mpindyewu, ndi mumanye ne ndi mu cyambilu. Ne ndi mumanye ne Nzambi udi kaaba aka. Kadi bivwa byenze anu bu ne Cintu kampanda civwa cyakwile munda mwa musuuka wanyi, cyamba ne: “Ndi mwindile bwa kumona ciwenzà wêwè pa bwalu abu. Ndi mupe Ekeleeziya bukookeshi Bwanyi.” Ki wêwè awu walukila cyakabidi ku ne: “Ambila mukuna ewu” awu. “Ndi mupe Ekeleeziya bukookeshi Bwanyi, nenku Ndi mwindile bwa kumona ciwenzà wêwè.”

<sup>191</sup> Ndi ndikonka ní ki lwidi lutuYe naalu kutudi dîbâ dyônsò, lwa ne Yêyè mmwindile bwa kumona citwikala twêtù mwa kwenza. Netwãmbè bishi bwa bimanyinu bya cikondo bitwáfumu ku diyiiisha ebi? CidiYe mufwanyine kwenza ncinyi? Yêyè mmwindile bwa kumona citwenza twêtù.

<sup>192</sup> Ee, mêmè kukwata kaacyanza kende kaa mwânà mutekete aku mu cyanyi mêmè, anu mu minu yanyi, mushindu *ewu*. Kavwa kakese be. Ki mêmè kwamba ne: “Mukalenge, teelejaku disambila dya musadidi Webe. Ne ku diitabuuja, kûndi mêmè ngiitabuuja ne Wêwè udiku aku, ndi nteeka pankaci paa démon wa kansere ewu ne mwoyi wa mwânà ewu, Mashi a Yesu Kilisto. Pankaci paa mushipyanganyi ewu ne mwânà, Mashi, ku diitabuuja nkûndi nteeka aci.” Nenku ncyakapeta mwa kwamba cîngâ cintu to.

<sup>193</sup> Mêmè kukudimuka anu cyanaana et kubanga dipatuka. Tatwëndè kuntwaye muunyima. Kwambaye ne: “Mwaneetu

Branham, Mukalenge nyewu uteeka pa mwoyi wanyi bwa mêmè kukupeeshaku ndambu wa byadiikumi.”

<sup>194</sup> “Kaa,” mûngààkambà, “mwaneetu, kutumu meeji aku to. To.” Mêmè ne: “Ncyêna dijinga ne mfranga to, mwaneetu.”

<sup>195</sup> Kwambaye ne: “Kadi’s mvwa mulameku ndambu wa byadiikumi.” Kaa, tufranga tukese, nyewu ngăpù mwoyi mene bûngi menemene buywayi, ngeela meeji ne yivwa ndola mitwe ku makumi ataanu. Yêyè ne: “Mukalenge ngudi muteeke pa mwoyi wanyi bwa mêmè kukupeeshayi.”

<sup>196</sup> Mêmè ne: “Nênkwambilè mudi bwalu. Nênyângatè, ne pashiishe neuyipingaje uyipeeshe Ricky mwânà wawa, mu mfranga yende—yende ya kumufucila lupitaadi. Bwalu, wêwè udi muyiishi. Mêmè ntu mumanye mûtùbi, mushinga udi naawu mfranga. Ne wêwè, missionnaire, ne mêmè ntu mumanye ne bitu bikengela mfranga. Ne wêwè ewu udi ne famiye, ne tubeji twônsò twa difuta ngangabuka etu. Ûyâlùjè ùkayèlè buludi mu mfranga ya difucila Ricky mwânà.”

<sup>197</sup> Yêyè ne: “Ncyêna muswe kwenza aci to, Mwaneetu Branham. Kî nya difuta bangangabuka to. Nya difuta bambi.”

<sup>198</sup> Ki mêmè kwamba ne: “Eyo, kadi mêmè’s ngudi uyaaluja bwebe wêwè.” Ki mêmè kuyibenga.

<sup>199</sup> Ki mêmè kuya too ne kwanyi kumbelu, nenku mu cintu cya mêmè makeese cyanaana, mbàngà ayi kupeepelayi, ne ludimi lwende alu kwalukilalu mu mwaba walu wa ciibidilu. Nzambi wakondopa mwânà mukese awu. Bavwa buumusha kashiba aku mu dinda dîngààkuumukà adi, pa muminu wende awu.

<sup>200</sup> Aci kadi kupapulaci beena Côte Ouest mujima awu. Ngangabuka mwende luumu kutumaye mwanende wa balume, mulwe ne mwikulwende. Kuyabo benda bangata njila ya bikoso, lwà mwamwa naka, ntanta wa miles makumi anaayi anyi makumi ataanu [kilômèètà 64 anyi 80], mu Pasadena, benda bangata njila ya bikoso bwa kufika mwaba wûmvwà ne cya kupicila awu, bwa mêmè kusambidila mwânà wa mu diboko uvwa ne didikoka dya misunya ya mu bwongo awu. Bavwa bamutwe lushingi lwa pénicilline, kufilaci kansere byumukile ku bwenzeji bwa lushingi lwa pénicilline alu mu cifuka mwende amu. Nenku ndi mutwishiibwe ne Mukalenge wakamwondopa.

<sup>201</sup> Pabwîpî menemene ne mêmè kuumuka kumbelu, telefone kudilaye, mutungunuke anu ne kudila. Mwaneetu Arganbright, mêmè kuumumvwa ukokangana ne muntu, wamba ne: “To, ncyêna mufwanyine kwenza aci to.”

<sup>202</sup> Anu menemene pânkaavwà ne mbwele mu mashinyi, ki kashinyi kakese kaa mukokakoka kàdì kàseemenà aka. Ûvwa nganyi’s anu mwaneetu mutekete wa balume wa beena Mexique awu ne mukajende! Bônsò babidi bafwe anu myadi batumbisha

Nzambi. Kwambaye ne: “Mwaneetu Branham, ndi mukutwadile byadiikumi ebi.”

203 “Kaa,” mûngààkambà, “mwaneetu, ncyêna mwa kwangata abi to.” Mêmè ne: “Ncyêna anu mufwanyine kubyangata to.”

Yêyè ne: “Kadi’s ndi mukutwadilebi.”

Mêmè kwamba, kwamba ne: “S’ndi mukwambile bwa kubyela mu mfranga ya difucila Ricky.”

204 Yêyè ne: “Mu dinda emu, pângàayi bwa kupeesha ngangabuka byadiikumi ebi, bwa kubyela mu mfranga ya difucila Ricky, ngangabuka wàm̀bì ne: ‘Kwêna naanyi mêmè dibanza dya kantu nansha kamwe to.’ Wàm̀bì ne: ‘Ncivwaku mêmè ne cya dyenza mu bwalu abu to.’ Yêyè ne: ‘Aci’s ncidika cinene.’ Yêyè ne: ‘Mêmè...Kwêna naanyi mêmè dibanza dya dyeyà nansha dimwe to.’” Pa nanku kwambaye ne: “Angata mfranga eyi, Mwaneetu Branham. Mukalenge ngudi mungambile ne wêwè nguvwa ne cya kuyangata.”

205 Mêmè kudyambidila ne: “Akaa, bwâlèè.” Mêmè ne: “Mukalenge, ncyêna ngumvwa mwa kwenza nanku to.”

206 Pa dîbà adi cintu kampanda kumvwilaci. Yesu mwimane dituku kampanda, mutangile muvwa bantu babanji bākùpa mantamfu manene a mfranga yabo mu kasheete kaa milambu. Kaa, bavwa naayi bûngì cyanaana, pa nanku’s bavwa bayifila bûngì cyanaana. Kadi mukaji mukamba mukese kampanda kulwaye ne tuumeeyà tusatu, ne twine atu ki twônso tuvwaye pende naatu. Ki twende pende tuvwaye naatu bwa kudyaye, kadi yêyè kutwelaye. Mpindyewu twètù tuvwa bafwanyine kwikala benze cinyi? “Kaa, mwaneetu wa bakaji, kwenjiku nanku to. Huh-uh. Udi mumanye’s, katwena dijinga ne aci to. Kwedi atu emu to. Atu’s ki twebe peebe twônso bwa wamona mwa kudya.” Kadi Yesu wakamulekela utungunuka anu ne kutwela, bwalu: “Kudi dibenesha dyàbûngì ku difila kutamba ku dyangata.”

207 Mêmè kwangata tuubyadiikumi tukese atu. Ncyêna mumanye cya dyenza naatu to. Nëntwèlè mu mwaba kampanda, mu mudimu kampanda bwa butumbi bwa Nzambi, mu mwaba kampanda ùdì mutambe bwîmpè mûndì paanyi mwa kwela amu.

208 Ncinyi ciine aci? Mbutumbi bwa Nzambi. M’Bukole bwa Nzambi. Mindidimbi yikaadi yenda yijimina; Kilisto ukaadi wenda umweneka, ki bwa cinyi bimanyinu ne maalu a kukema bikaadi byenda bimweneka. [Mwaneetu Branham udi utuuta bintu pa cyambilu misangu mwandamukulu—Muf.] M’Bukênkè bunene bwa Mwânà abu budi munkaci mwa kudileejila ku mitooto ya mu dinda, mwikale ne dyondopa mu mapwapwa Ende. Kadi piikalaYe mwa kutwadila dyondopa ku didileeja dya Bwikadi Bwende, cyenzaYe ncinyi paadivwilaYe Yêyè mwine? Mibidi yetu yidi yibola eyi neyishintuludiibwe ne neyivwijibwe mifwanangane ne Mubidi Wende Yêyè mwine wa butumbi awu. Nebiikale cinyi paalwaYe? PambaYe kulwa apu, twètù tudi ne

kusakidila bwa Bukênkè bwa Mwânà bwa Bwikadi Bwende, padi mitooto ya mu dinda yibànda bimanu byalabale bya dyendelapu bya mu Butumbi apa, ne yishaala miimanyinepu bwa kusekelela Dilwa Dyende mu dîbà dya mîdimà edi.

Tusambilaayi.

<sup>209</sup> Éyi Mukalenge, tudi baKunange bikole, Mukalenge, mu mushindu wa ne kakwena mushindu wa kwamba ne ntoo ne ku dîbà kaayi. . . Katutuku tucyoka bwa Kufila kwa majaadiki a butumbi Bwebe nansha. Kadi dîbà dikaadi difike mpindyewu, nyewu kudi babeedi bindile. Wêwè udi mumanye majaadiki aa. Ôwò aa, bwa ku dyanyi dimanya, Mukalenge, adi bulelela bwa menemene. Ebu bwa mwendeshi wa ndeke uvwa mwimane mwaba wawa abu, uvwa uleeja muvwaye mwa kwimanyina kuulu awu, ne màsaamà ônsò avwa naawu mubidi wende awu; nenku kubunyaye mikolo ya mupanu wende ne kuleejaye binù byende ne mikolo yende biikale bizaaza byônsò ne bishaale ne bibangu, myaba yivwa bangangabuka bateeteete bwa kutwangajulula mifuba. Wêwè uvwa mumone muvwa mukaji awu mwimane mwaba wawa ne bilaabu kwîsù, ne muvwabi byenda bikupuka ne binsonji bya disanka, pavwaye ulonda muvwa dîsaamà dyende dya binyoka adi dyondopiibwe ku Bukole Bwebe. Ne bwa mwânà mukese munanga wa mu diboko awu, ne bujaadiki bwa tatwëndè ne bwa aba bàvwàpu abu.

<sup>210</sup> Mpindyewu, Mukalenge, Wêwè udi munene kaaba aka mu dinda emu, mu tabernacle emu, anu mŪdi myaba kana yônsò pa buloba. Ne Wêwè utu mulaye ne mwaba utwikala basangile awu, Wêwè newikale munkaci mwetu. Mpindyewu netubiikile babeedi baudi Wêwè mututumine mu dinda emu abu. Nenku netubasambidile, ne netusambile ne mwoyi wetu wônsò, disambila dya diitabuujà. Nenku swaku usungile babeedi ne ubajuule panshi. Ne piikalabo benze mpekaatu, bafwileku luse, Taatù, patudi tutondelangana bilema byetu muntu ne mukwende apa, ne tusambidilangana muntu ne mukwende. Ne Wêwè utu mwambe ne: “Disambila dya bwenzeji, dya kapyà dya muntu mwakane didi ne dikwacisha dyàbûngi.”

<sup>211</sup> Tudi bamanye bwalu bwa ewu udi mulaadika kaaba aka munkaci mwetu emu mu dinda emu, mwikale anu maamù mutekete ne bânà batekete aba. Mukalenge, bilondeshile bangangabuka, yêyè ukaadi pabwîpì ne ndekeelu wa lwendu lwende. Kadi twêtù tudi tulomba, Nzambi, bwa Wêwè kwimana pankaci pende ne mwena lukuna awu. Nenku patwamulaaba maanyi ne kumusambidila, swaku bwa Bukole Bwebe bulenge musuuka wende awu. Aci necitwale diitabuujà ne disungidiibwa. Nenku swaku apingane kwende kumbelu ne asangale, ne afile butumbi, ne ikale dileeja dya Mutooto wa mu Dinda, bwa butumbi bwa Nzambi. Amen.

<sup>212</sup> Mwaneetu Mercier, mpindyewu, patudi twakidila bantu aba bilondeshile bipungidi apa, bantu bàdi benda balwa aba. Netubiikile anu nomba ewu. Nenu mbafundiibwe pa dibeji dya mênà a badibo ne cya kusambidila.



*NSENTEDI, UDI WAMBA BISHI BWÀ BUFÛKU?* LUA58-1130  
(Watchman, What Of The Night?)

Diyiisha edi dya Mwaneetu William Marrion Branham, dyakayiishiibwa bwa musangu wa kumpala mu Anglais mu dyalumingu mu dinda, mu matuku 30 a ngondo wa dikumi ne umwe, cidimu cya 1958, mu Branham Tabernacle, Jeffersonville, Indiana, U.S.A. Ndyumusha pa mukaba wa mêyi ne dituuta ku cyamu mu kaabujima kaadi mu Anglais. Nkudimwinu wa mu Ciluba ewu mmutuuta ku cyamu ne mwabanya kudi Voice Of God Recordings.

CILUBA

©2018 VGR, ALL RIGHTS RESERVED

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)



## Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)